

DISPUTATIO INAUGURALIS MEDICA,
DE

OFFICIO MEDICI
CIRCA CASUS CHI-
RURGICOS DICTOS.

Quam

SUB DIVINIS AUSPICIIS,

RECTORE MAGNIFICENTISSIMO,

SERENISSIMO PRINCIPE AC DOMINO,

DN. PHILIPPO WILHELMO,

PRINCIPE BORUSSIÆ, MARCHIONE BRAN-
DENBURGICO, AC DUCATUS MAGDEBUR-
GICI GUBERNATORE, RELIQUA,

IN ALMA REGIA FRIDERICIANA,

SUB PRÆSIDIO

DN. GEORGII ERNESTI STAHL,

MED. D. EJUSD. ET RER. NATUR. PROFESS. PUBL. ORDIN.

ACAD. NAT. CUR. COLLEG. LONG. DIGN. FACULT. MEDIC. p. t.

DECANI SPECTATISSIMI,

DN. PATRONI AC PROMOTORIS SUI, OMNI OBSER-
vantiæ, humanitatis ac pietatis cultu æternum prosequendi,

PRO LICENTIA,

Summos in arte MEDICA HONORES, Jura, ac Privilegia rite
ac legitimè capeffendi,

Ad diem Julii MDCCX, H. L. Q. C.

Publicæ Eruditorum disquisitioni submitter

JOHANNES GEORGIUS Sertell

PRACTICUS WURZENSIS.

HALÆ MAGDEBURGICÆ,

Literis Christiani Henckelii, Acad. Typogr.

DATE OF THE YEAR 1874

OFFICE MEDICAL

CIRCA 1874

FOR SURGICAL DICTOS

AND

SERIES OF THE

OF THE

OF THE

OF THE

IN THE

OF THE

OF THE

OF THE

OF THE

OF THE

OF THE

OF THE

OF THE

OF THE

OF THE

OF THE

OF THE

OF THE

OF THE



PROOEMIUM.



Silenos Alcibiadis me-

morant simulacra fuisse, ea dexteritate fabrefacta, ut, cum semel serium quiddam, aut plane sacrum, sub certo sui positu, oculis obtulissent, mutato flexilium partium situ, ridiculam, aut obscœnam i-

maginem exhiberent. Non attinet dicere, quid de usu horum, ad quem Alcibiades icunculas has adhibere fueverit, historici narrent; cum sufficere possit dixisse, quod hæ relationes imitentur potius, quam simpliciter proferant, hos Silenos: dum aliæ scurram ex Alcibiade faciunt, serias res in jocos atque risus hac ratione traducunt: aliæ plane contra, è jocosis & futilibus initiis, ad serias contemplationes revocandi, hoc ipso medio artificem eundem repræsentant. Illud satis certum est, quod omnia hominum cœpta, & ipsa rationis humanæ occupatio atque applicatio, Silenorum horum sculptilium indolem, quam maxime sequantur; dum alibi inutiles res seriis anteferre, imo has velut in istas conver-

tere & transfigurare, aggrediuntur: alibi vero, ex ad-
 verso, inanes res & occasiones, tanquam in meliorem
 viam & usum reducere allaborant: aut certe emendare
 minus utilia, & ut bono alicui scopo inservire possint
 supplendo atque instruendo, adornare cordi habent.
 Elucescit autem in hoc genere triplex propemodum
 scopus & propositum animi humani. Ita enim alibi,
 nihil sibi neque inaccessum, nec invictum reputans, ad
 minimum voluntate, omnia complectitur. Habet au-
 tem subinde in hoc genere opus, consolari se poëtico il-
 lo - - *si non tenuit, magnis tamen excidit ausis.* Altera via,
 trita propemodum mortalibus ab uno extremo ad alte-
 rum transgressione, nimium vel timens, vel negligens,
 odit vastas diffusiones, & ad singularia potius se restrin-
 git: neque sic damnando cœpto, si potius è vera sua-
 rum virium æstimatione (ut per individua) hoc agat,
 quam ex ignavia, aut nimis parva de bene ordinatæ ra-
 tionis usu fiducia, ita ut in genere, decernat, & quod
 ipse non possit, id alium etiam neminem posse, ignava
 arrogantia arbitretur. Tertia vero via beatum utique
 illum in rebus humanis modum, auream mediocrita-
 tem, observans, sola inservit ad componendas rerum i-
 ta diffidentium lites, &, quid tranquilla atque bene or-
 dinata ratio valeat, aut nequeat, fanciendum. Harum
 rerum ut specimina aliqua è Medicæ Artis complexu
 exhibeamus, allegare volumus triplex mortalium institu-
 tum, circa discendam atque tractandam Artem Medi-
 cam. Equidem jam ipse quoque Hippocrates hoc, i-
 ipsa collectionum suarum solertia, professus esse agnosci
 potest, & tanto magis Galenus, minoresque æque, ut
 vulgo audiunt, Græci, quam Arabes, cum suis asseclis,
 quod

quod unus idemque homo , toti morborum cohorti, cognoscendæ atque artificiose domandæ, sufficere, & artem hanc tam discere abunde, quam exercere, possit. Et habent profecto, & habuerunt omni tempore, idem sentientium, maximum cœtum. Contrarium visum fuisse hominibus, antiquissimæ atque profundissimæ sapientiæ nomine, vulgo celebribus, Ægyptiis, & antiquiora aliqua monumenta fidem faciunt, & suo adhuc tempore ejus rei vestigia reperta affirmat Prosper Alpinius: dum nempe non nisi singulis morbis seorsim dictos atque operam suam addicentes Medicos, educari atque tolerari, consultum duxerunt. Suppetit autem omnino huic apparenti contrarietati remedium, ab ipsa media harum rerum consideratione, & justa distributione, expectandum: dum nempe antiquæ illæ admonitiones, solerti pensitationi, sed tanto magis, circumspcctissimo usui, commendantur: *Non omnia possumus omnes; &: Metiri se quemque suo modulo ac pede verum est.* Licet enim negari minime possit, tanto magis autem prudentissime expendi, & justissimo usui adhiberi deberet, verissima illa observatio, quod ingenia vastioris talis ambitus & complexus, ut latissime certe patentem medicam Theoriam atque Artem, satis dextre & feliciter exhauriant, non certe ita quotidiani proventus, & ubilibet obvia, existant: tamen, cum etiam nulla talia dari, aut non, si modo justus selectus institueretur, tot quæ sufficere necessitati possent, etiam minus firmum foret assertum: non videtur propterea, ita ut in univsum, huic instituto jus suum derogari posse, & omnia ad nudas illas figillares praxes & administrationes medicationum, singulorum hominum pro singulis morbis, re-

vocare & adstringere. Unde quidem media in his rebus via, planissima æque atque securissima, certo futura esset illa, ut idoneis & bene habilibus tantum ingeniiis, Medicinæ discendæ atque exercendæ facultas concederetur: secus autem affectis, libertas illa veluti promiscua non pariter tribueretur: Interim, cum ne votis quidem, nedum consiliis talibus, ullus pateat locus, bonæ fortunæ, imo potius Providentiæ divinæ commendanda est atque relinquenda negotii hujus universitas: cuilibet interim artem hanc aggredienti, consultissimum utique fuerit, uti Scientiam, ita Conscientiam suam, serio ad examen revocare, quousque tam arduo negotio atque cœpto parem sese ipse judicare possit, & quanto cum studio ac industria, omnes vires eo intendere conveniat, ne majora iisdem, imo vel plane aliena ab illis, temere occupentur, in publicæ, & proximi privatæ, rei, & multum, & magnum detrimentum. Ne tamen inanem operam impendere censeamur, in talibus admonitionibus proferendis, quas insignem aliquem effectum fortituras esse, vel nostro ipsorum judicio, parva spes affulget; placuit exemplum quasi strictius, è specialioribus artis medicæ partibus perlustrandum sumere, & qualem usum in illo habere possit, tam universalis illa notitia, quàm particularis peritia, imo potius utrarumque justa subordinatio atque conspiratio, explanare: tanto magis utique, cum ejusmodi exemplum, admodum frequente casu, in Republica, non solum querelas, & injustas aliquando imputationes universæ arti incumbentes, excitet & veluti provocet: verum etiam altercationes & forensia litigia satis sæpe invitet: quibus omnibus rebus, atque adeo oriundis inde ægrorum peri-

riclitantium damnis, ulla alia ratione consuli nunquam poterit, nisi illa sola, si cuique suæ partes, ut jus fasque est, non solum recte atque ordine tribuantur, verum etiam potius injungantur, imo serio tunc ab unoquoque exigantur, quando vel necessitas à priori postulat, vel à posteriori, de administratione debita auxiliorum, quæstio aut querela incidit. Dignam autem omnino judicavimus hanc considerationem, quam pro THE-
MATE INAUGURALI tractandam nobis fu-
meremus, nempe de OFFICIO MEDICI CIRCA
AFFECTUS ET AUSUS vulgo CHIRURGI-
COS dictos.

DEUM autem T. O. M. supplices veneramur, ut etiam hac in parte medicæ disquisitionis, animum no-
strum ad veritatem puram & sinceram commonstran-
dam, dirigere atque viribus idoneis instruere clemen-
tissime dignetur.

I.



DE OFFICIO MEDICI, CIRCA AF-
FECTUS ET AUSUS CHIRUR-
GICOS, vulgo dictos, sermonem habitu-
ri, quid proprie in animo habeamus, expro-
memus in ipso statim limine; ita tamen, ut
nihil amplius, quam summos rei apices hoc
in loco exponamus, & tanquam nominum solum verum signi-
ficatum, adeoque nostrum circa illa sensum, explicemus.
CHIRURGIA equidem, quid vi vocis ipsius denotet, no-
tum abunde est. Sed nihilo quoque minus notum, quousque
vulgò illa extendatur; Nempe non tam ad illa solum, quæ *ma-
nus* immediatè, perficiunt aut exsequuntur: Sed perversa cer-
te ἀκυρολογία, quicquid *manu* solum *admovetur*, & simplici-
ter

ter applicatur, apprimitur, alligando firmatur. Talibus operationibus, nempe solum apponendi res, quæ de reliquo ab omni manuum directione, imo quacunque illarum potestate longissime absunt, *Chirurgiæ* nomen tribuere si conveniret, longe certè majore jure *Pharmacopæis*, imò quam maxime illorum *famulis*, *Chirurgorum* nomen, hoc in sensu competeret, qui longe plus *manibus* ad harum rerum productionem concurrunt, quam vulgo dicti *Chirurgi*, utpote qui de reliquo tantundem sibi, quam ipsi patienti, ignotas easdem res, nude & simpliciter loco alicui admovendo, quicquid hic *Chirurgiæ* nomen exhaurit, eo ipso absolverunt: adeo, ut hoc intuitu quilibet patiens, aut quicunque demum ipsi assistens, hanc *Chirurgiam* tam doctè atque scitè, imo etiam in plerisque casibus tam dextrè, applicare & administrare possit, quam vel disertissimus *Chirurgus*. Interim, cum tyrannus ille meliorum morum, *usus*, ad vulgò dictos *Chirurgos*, etiam hoc negotium devolverit, iisque tanquam *obnoxium* addixerit, orta hinc est appellatio illa *catachrestica*, ut *Chirurgicorum* affectuum atque *casuum* nomine, vulgò veniat, quicquid vel nuda applicatione *manuali* ægris adhibendum occurrit.

II.

Cum autem prolixis præmonstrationibus opus non habeat, sed facillimè potius intelligi possit, quod in hujusmodi casibus *boni*, imò cujuslibet, *effectus* universa vis, absolutè posita sit in illarum rerum, quæ ita applicantur, *insita* energia atque efficacia; cujus non *applicatio*, & quæcunque tandem *appositio* seu *adhibitio*, sed vera *cognitio*, *intellectus*, & *judiciofa* destinatio, universum rei *cardinem* ita exhauriant: agnoscet proinde facilè quilibet, quam solido atque pleno jure, hanc rem *Medicæ Chirurgiæ* nomine complectantur illi, quibus non tam *scholasticæ*, quam plane *practicæ*, distinctionis, *utilitas*, imò verius quotidiana necessitas, nota satis & perspecta est. Ut itaque sensus proprie ille hic subsit, quicquid *externa manuali* appositione, corpori adhibendum venit, illud equidem tan-

tis-

tisper *chirurgica* applicationis nomen sortiri possit; interim, cum totus ejus *usus & effectus*, magis pendeat à solida *notitia*, & *judiciosa* destinatione, qua tali cuique affectui, certa talis materia convenire, judicari atque decerni debet: non *manuum* certe, sed *ingenii*, & cum recta ratione efficacis habitus, pluribus, & penitioribus *comparationibus & considerationibus* innixi, est illa *discernendi* atque *decernendi* habilitas: manente tandem *manibus* earumque officiis ultimo loco, res bono judicio discretas atque decretas, simpliciter ad locum debitum apponendi.

III.

Cum autem contra hunc harum rerum *ordinem*, & unicum verum atque justum *usum*, ipsum imprimis vulgus Chirurgorum, ausibus certe iniquis, imo passim etiam temerariis, indies insurgat, & sibi plenum harum rerum jus atque potestatem, illiberaliter arroget atqueumat: ad *Officium* certe *Medici* pertinet, ita rebus his invigilare, quò non solum *Respublica Medica*, sed omnino etiam *universa Civilis*, nullum hinc detrimentum capiat. Id, quod eo cumprimis absolvetur, si, qua pollet usquam propriâ, aut *Magistratum* publicorum sociâ, autoritate atque concursu, in illud incumbat, ne Chirurgis, maxime omnium autem *minus peritis*, liberum sit atque concessum, ut sine *consilio* aut *consensu* *Medici*, res *medicamentosas*, pro nuda suâ opinione & arbitrio, promiscuè, patientibus adhibeant. Tantò minus autem in *difficilioribus* atque verè *intricatis*, imò verius *complicatis*, casibus, ubi etiam *interna Medicatione pharmaceutica*, judiciose subordinanda opus est, suis consiliis & auxiliis omnia vindicent atque permittant: multo minus illud sibi sumant, ut ipsi pariter harum etiam universarum rerum, *experimenta* sumant, & jam *Purgantia* pharmaca, jam *Diaphoretica* regimina, jam *Venesectiones*, jam nescias quæ *Arcana*, in corpus assumenda, interponant.

IV.

Quia vero usus & ausus tales, nequaquam semper unice à *Chirurgis* ipsis vulgo dictis dependent; sed pluribus quam quidem deceat aut expediat, exemplis, ab illis, partim conivendo, partim fovendo, sustentetur, quorum non solum auctoritas, sed ipsum etiam officium, obicem potius his turbis & abusibus ponere, conveniret: præterea etiam locum hic habere possit illa differentia, quando unus Chirurgus præ aliis, veriore longo usu, & non vano prætextu, allegata experientia potitus, præsto est: quo utroque casu prudens utique *temperantia* locum habeat, imo postulet: Erit propterea etiam hanc rem expendendi & prudenter denotandi, locus. Quapropter has utique res, iusto ordine prosequi & exequi satagemus.

V.

Chirurgiam, stricto atque proprio sensu dictam, occupatam esse circa *manuales* operationes, quibus corporis humani, *solidarum* præcipue, partium vitiis, aut, *per solidas, fluidarum* aliquibus necessitatibus subveniatur, neminem latere potest. Unde habet ita considerata Chirurgia, quod exerceat in *Vulnerum, Ulcerum, mundificatione* manuali; *Fracturarum* atque *Rupturarum* repositione: utrarumque *deligatione*: Rerum præter naturam *abscedentium* educatione atque remotione: *Humorum*, qua patet proxima via, per Incisiones patefacienda, *emissione*: Rerum quarundam extrinsecus *applicandarum*, quantum *manuum & instrumentorum* ope fieri potest, *dextra admotione*: &c. & ad omnes hos affectus intervenientibus instrumentorum applicationibus. Verbo, quousque vel *liberæ*, vel artificiosis *instrumentis* armatæ, *Manus*, pertingere, atque opem per *operationes* ferre possunt, operationes inquam crassius *machinales*, & partibus etiam *crassioribus* corporis, ut *immediate*, adhibendas: eousque extendit sese, ditio, vera, atque iusti limites, vero sensu suntæ Chirurgiæ. Ad *Medicam* vero utique, quam maxime *scientificam*, &
plu-

pluribus *rationalibus* considerationibus, comparisonibus, & hinc formandis conclusionibus superstruendam, *æstimationem*, *consultationem*, atque ultimam *destinationem*, pertinent omnia illa, quæ subtiliori alterationi craseos humidarum partium, & tempestivis earundem *motionibus* per partes solidas, conducere, & pro constitutione, certo aliquo tempore deprehendendâ, convenire, œconomix corporis bene conscia & edocta *Ratio*, suadet; *Experientia* vero, non cruda, sed omninò solers atque circumspecta, docuit, per quæ *Remedia*, tanquam *instrumenta*, utilis, seu potius necessarius, hujusmodi artificiosus effectus, obtineri possit.

VI.

Jam verò, si etiam quam maximè *intra solidas* partes, sed tamen ab *humoribus*, aliquod vitium prognatum præstò sit, quod non simplici *emissione* emendari possit; sed *craseos* prius humorum alterationem, vel ab arte, vel à justo tempore, expectare possit atque debeat: Quilibet utique facile intelliget, quod talis constitutionis justa agnitio seu *dijudicatio*, *mente* sola exercitata, & multiplicium respectuum, eorumque justæ comparisonis, peritâ, discerni, & quicquid circa illam, aut ad illam, conveniens fuerit, decerni possit. Frustra vero, simpliciter, ad hujusmodi res statuendas, omninò sit, omnis *manualis* dexteritas, & *machinalis*, *habilitas* æque, atque *agilitas*. Unde utique ad hujusmodi constitutionem *Medicopharmaceutica* peritia opus est; notitia videlicet sufficiente ejusmodi *Remediorum*, quæ partim materiam ibi coacervatam, & qualicunque, imò vel solum *coagulationis*, dyscrasia affectam, corrigere & ad refluxum disponere: vel partes continentes ita afficere possint, ut illæ ad reprimendum, (tremulo suo & quasi fremebundo, subtili motu *tonico*,) adeoque dispellendum quicquid ita incumbit, tanto vegetius concurrant. Sicut etiam in ita apertis locis, ut *Medicamentum*, humorem corruptum vere immediatè tangere valeat, pro *corrigenda* præsentē, & *inhibenda* adhuc ulteriore, corruptione, idonea

pharmacatam cognovisse, quam cum recto judicio, veris suis subjectis, nempe illis, quibus propriè debentur corruptelarum speciebus, recte adhibere, *judicii* utique exercitati, & *scientiæ*, non autem *operationis* alterius artificiosæ, est objectum.

VII.

In hoc nempe versatur illa, de qua sermo nobis est, *Medica Chirurgia*; nempe, non solum *Pharmacia* Chirurgica, seu notitia sufficiens Medicamentorum, quæ ad corrigendos, resolvendos, dispellendos humores, alicubi ita negotium facessentes, recte inservire possint: verum etiam *intellectus* justus, *temporis*, *ordinis*, justæ *subordinationis*, & debitæ *observationis*, atque prudentis quasi *gubernationis*, propriarum naturalis *synergiæ*, instaurationum atque reparationum. Quæ omnia, inquam, atque singula, habent utique plane aliud aliquid, quam quod *Chirurgiæ* nomine, quomodocunque tandem sumto atque dilatato, comprehendere, aut in ejus ambitum ullo jure, imò ulla specie, includi possit.

VIII.

Paratam quidem jam pridem novimus responsionem, quod efficacia Medicamentorum talium, qualia his scopis verè quadrant, etiam ita nudæ *experientiæ* insistere possit, ut sola memori mente comprehensa experientia de eadem, sine ulteriore *speculativa æstimatione* aut comparatione, necessariis administrationibus talium, satisfacere possit. Sed est etiam reverà nihilominus prompta æque, atque agnitioni prudenti perceptu facilis, responsio, duabus in primis positionibus innixa. Nempe 1.) quod tota hæc assertio minimè sit simpliciter & absolute vera atque firma; dum non modo varii, sed etiam satis frequentes, ejusmodi casus occurrunt, ubi nuda hæc notitia *generalis*, negotium minime exhaurit, sed potius longe solertior comparatio atque *dijudicatio* constitutionis præsentis æque, atque succedentis de tempore in tempus, necessaria magis sit, quam solum utilis: 2.) Eoque ipso etiam solertiore, di-

judicandi res præsentes, & decernendi res præstandas, dexterritate, non *Manuum*, sed *Ingenii*, præsentibus necessitatibus consulendum venit. Ubi inprimis in complicatis casibus, & ab *individuali* patientium aliqua constitutione peculiari sustentatis; aut à *cacochymia* universaliori fomitem suum trahentibus, altiore certe peritia opus est, quam quæ in officinis chirurgicis usitatis, nempe *Tonstrinis*, quæri debeat, nedum inveniri possit. A *Medico* verò, nisi hoc nomine penitus indignus esse velit, ita non possit, nedum ut ullo modo debeat, abesse, ut potius ad prima atque intima artis suæ fundamenta, illam absolutè pertinere, non possit ignorare.

IX.

Auditur autem etiam alia objectio, sed quæ etiam spontè prodit, quod à talibus hominibus proficiscatur, quibus illa emolumento esse non possit: dum nempe ipsa hæc, defectum judicii atque solidæ discretionis tanquam ob oculos ponunt. Homines esse monet, tam Chirurgos, quam Medicos; nempe rectâ ratione ita instructos, ut ejus usum, tam illi quam hi, rectè instituere valeant, neutri autem de prærogativa simplici, & inprimis velut in præjudicium aliorum, vel possint gloriari, vel debeant. Unde concludunt, tam Chirurgum, quam Medicum, justa *informatione*, solerti *studio*, longa autem inprimis atque circumspecta *experientia*, compotem fieri posse, quantacunque tandem supponatur, aut re ipsa requiratur. Sed quis non intelligit, quod hac ratione *primo* imperitè mutetur seu confundatur status quæstionis; quæ nusquam est, quid *homo*, adeoque Chirurgus aliquis, quatenus *homo* est, possit comprehendere & condiscere: sed quid, *quà Chirurgus*, debeat scire? *debeat* inquam, posse magis, nempe *manuali* dexterritate, toties quoties, exercere atque in effectum deducere: Ita ut illud non possit *nescire* aut non callere, nisi exquisitissime nomen *Chirurgi* amittere velit. Harum autem rerum, *Pharmaceuticæ* inquam Chirurgicæ, non possit solum ignarus esse, sed etiam communissimis exemplis *soleat*. Rectissime

vero illi omninò sentiunt, dummodo aliquid amplius quam sententiam sermonibus agitare vere cordi haberent, qui rem hanc, dico veram atque solidam etiam *Pharmaciae Chirurgicae* peritiam, studio & opera, rationis & experientiae sociis subsidiis, sibi acquirere contendunt. Interim sermo non hic est de eo, quod fieri potest, sed quod fieri solet. Neque quid cadat in *hominem*, sed quid in *Chirurgum*, quà *talem*.

X.

Ubi nempe, *secundò*, longe utique notissimum est scandalum illud, ubi usitatissimæ, & passim obviæ, *officinae*, è quibus Chirurghi prodeunt, nempe *Tonstrinae*, quid bonæ spei promittere possunt ad tradendam hujusmodi *Doctrinam* discipulis? Cum satis sæpè Magister ipse, nihil veræ atque solidæ *peritiae* possideat; Præterea Praxin ipsam, vel ita *raram*, imprimis intuitu *varietatis* affectuum, habeat: vel eandem etiam ipse ita imprudenter atque imperitè exerceat, ut nihil boni ab ipso *discere* possit discipulus: ut ita quolibet intuitu, optabilis de reliquo omninò illa spes, verè ita in herba suffocetur atque intercitat.

XI.

Tanto minus autem, *tertiò*, ullam justam considerationem hic assequi potest illa allegatio, *longæ* atque *multæ Experientiae*. Quandoquidem talis *experientia*, quæ prævia atque præside *rationis* cynosurâ destituitur, nunquam bonam frugem promittere potest, sed semper potiùs antiquum obtinens, passim in illas syrtes illiditur, (quas etiam *Medici* ut caveant, alia profectò industria atque animi ipsius institutione opus est, quam quæ à trivialium scholarum commentis atque commentariis expectari possit,) ut qualescunque tandem sequentes *salutares*, ad sanitatem, exitus & eventus, absurda simplicitate *suis consiliis* & inprimis auxiliis, atque indubiæ operationi Remediorum usurpatorum, adscribant: negligentes, aut non intelligentes, præcipuas in hujusmodi negotiis, *Naturæ spontè*
ope-

operantis, partes : Nisi quando, præter consuetam sibi, sub suis artibus, formulam, restitutione alacrius atque vegetius succedente, quasi admirabundi enarrant, der Patient habe eine trefliche heilsame Haut/müsse treflich balsamisch Geblüt haben/ & similia, tanquam per nebulam ipsis occurrentia, aut per somnium succurrentia. Quo profecto intuitu etiam quantumlibet longa talium hominum *Experientia*, præjudiciis hujusmodi superstructa adeo parum usus ipsis præstat, ut nihil inde certius reportent, quam in nuda illa, & nulla Ratione subnixa, cæca *Empiriâ*, firmiorem obdurationem.

XII.

Quid verò, quod si vel maxime voti illius damnari obtingeret, ut hic illic, verè prudentius peritus, unus aut alter Chirurgus, inveniretur, nihil tamen hoc detraheret *summæ* nostri negotii, nempe *Officio Medici* circa *casus chirurgicos*, quò minus Ille obstrictus veluti maneret, ad invigilandum talium rerum optimo intellectui : Idque duobus respectibus. Primò, ut *minùs peritos* Chirurgos, inter quos vivere obtinere ipsi potest, omni meliore modo instruere, regere, aut temerariis illorum ausibus, cordatè, sed & solidè, obsistere possit. Secundò, interest certè ipsius Medici, ut ille, quantum usquam fieri potest, optimè *Chirurgicarum* rerum, absolutâ autem necessitate *medico - chirurgicarum*, seu *Pharmacie Chirurgicæ*, gnarus atque peritus fieri allaboret, etiam eo intuitu, ut si cum *perito* etiam, & quàm optimo Chirurgo, concurrere occasio ferat, non ab hujus nutu pendere necesse habeat.

XIII.

Quamvis enim nihil attineat dissimulare, quod etiam passim imperiti atque rudes, nedum aliquantò peritiores *Chirurgi*, tanquam in ore quodam semel recepto, *Medicis* vulgo non tam æque vitio vertant, si illi Chirurgiæ parvam scientiam aut curam præ se ferant : adeò, ut etiam audaciores, vel vitio vertere atque indignari soleant Medico, si ille aliquid interloqui ipso-

ipforum consiliis & auxiliis, suscipiat: & tanquam persuasissimi passim sint, veros intercedere debere *limites*, inter *Medicam* & *Chirurgicam* praxin; imò Chirurgiæ ita *privilegiatos*, ut Medicus illos transilire nullo modo debeat; dum interim illi parum nefas ducunt in Medicinæ ambitum irrumpere. Tamen reverà planè contraria ratione sese habent res, imò habere debent, ob rationes luculentas jam allegatas.

XIV.

Tertia objectio, est iterum talis, ut officinam sui prodatur. Ubi sunt, inquiunt illi etiam, qui illam circà res chirurgicas *peritiam* habent, ut verè *docere* valeant Chirurgum, quid factu sit opus? Quasi verò non simplicissimæ rationi liqueret, quod pro benè *exercitato* atque rerum suarum gnaro Chirurgo, *Medici* præsidio non sit opus: pro *inexercitato* autem & magis rudi, certè *præsumtio* semper stet pro Medico, quod ille plus possit: cum certè *debeat* legitimè, harum rerum plus intellectu comprehendisse, quàm talis commatis Chirurgus. Deinde verò, hoc ipsum nos hic agimus, ut Medicum *officii* admoneamus; quò, si quid hac in parte ipsi desit, incumbere hoc sibi intelligat, ut illud corrigat, suppleat & expleat. Ceterum, quicquid autem hic illic veri fortè subesse posset, circa Medici unius aut alterius, *imperitiam* de chirurgicis rebus; subest tamen adhuc ratio aliqua, quæ in *communi* inter Medicum & Chirurgum *imperitiâ*, Chirurgum velut ordinariè & notoriè justæ censuræ exponit, præ Medico. Versatur autem circa temerarios ausus *violentiorum* tentaminum; & quidem, quod præcipuam notam nostræ admonitionis quam maximè confirmat, non tam directè *chirurgicorum*, nempe circà *manuales* instrumentales operationes occupatorum: sed *pharmaceuticorum* potius, in varii generis *causticis*, *septicis*, *acribus* & *calidis* dictis, intempestivis *adstringentibus*, &c. *Mercurialibus*, *Arsenicalibus*, *spastica* & alia *anxia* symptomata, non magis circà ipsam partem affectam, quam etiam in distans, imò in universam œconomiam corporis, inducentibus,

bus, in genere vero variis modis mala corporis in deterius convertentibus. Qualium rerum protervis abusibus, rarissimi certè favent Medici, utut aliquis horum, de reliquo, ad ferendum auxilium & formandum opportunum consilium, fortè minus instructus fuerit debitâ scientiâ atque peritiâ. Ubi brevibus notari meretur, familiarissîma illa circâ *Praxin* Medicam & Chirurgicam offensionum diversitas; dum ibi inopiâ consilii, & ab hac expectanda *omissio* necessarii auxilii, longè rarioribus exemplis, (uti reverà etiam longè rarioribus casibus, ubi ita magnopere errare proclive foret,) insigne aliquod damnum contrahitur ab *omissione* tempestivæ necessariæ Medicationis: quàm â *commissione*, *ineptarum*, *intempestarum*, præcipuè vero *activarum*, & cum *vehementiâ* efficacium, temerariarum, tractationum.

XV.

Manebit itaque omninò bene confirmatæ rationis suffragio, *Medicæ* potius *directioni*, quàm soli Chirurgicæ *persuasioni* & *opinion*i tralatitiæ, commendanda, imò demandanda, ordinatio Medicationis *Pharmaceutico-Chirurgicæ*. Tantò magis autem, in casibus aliquantò magis *implicatis*, *refractariis*, *malimoris*, imò *periculosis*. Adeò, ut non solum humaniter monere atque dehortari Chirurgo, Medicum deceat, â temerariis circa talia subjecta ausibus: sed obstinatos, etiam idoneo loco atque tempore, modò secundum veritatem & sine alio pathetico affectu, ita coarguere, quo Superiorum feriis decretis, periculosa audacia & indiscreta contumacia, refrænetur, & maturis æque, atquè benè fundatis, consiliis, locus fervetur.

XVI.

Antequàm autem *generalior*em veluti deliberationem instruamus, quâ præcipue ratione quàm commodissimè consuli posset, non tam ipsis *Chirurgis*, quàm veræ *Chirurgiæ Pharmaceuticæ*, est sane adhuc verbum unum & alterum proferendum, de offendiculo quodam, & obstaculo, tam â *Me-*

dicorum ordine, quam *Magistratum* autoritate, introducto, confirmato, adeoque tandem etiam passim penitus obfirmato. His nominibus meritò notamus, institutionem & instructionem Chirurgorum *Castrensum*, die Bestallung / Anweisung / und Versehung / der Geldscherer / mit ihren Geld-Kasten. Absit quidem à nobis, ut, quod habet proverbium, *unguem ulceri* huic adhibeamus, & gratis quasi, filiam veritatis, odium ambiamus. Illud tamen dissimulare, quod & in se satis claræ luci expositum est, & tam scientia quoque, quam conscientia postulat, ut ad animum revocetur, præterire, nec alius affectus, nec in primis metus, unquam nobis persuaserit. Facile certe quilibet agnoscet diversitatem, inter Armamentarium tale *Pharmaceutico Chirurgicum, & Medicum*; einen Geld-Kasten / und eine Geld-Apotheque. Quid interim familiariter hoc in genere usu veniat, neminem etiam fugit, nisi quidem fortè omnium harum rerum incurium. Dum hinc inde, Chirurgi etiam singularum cohortium, vel centenis speciebus, etiam ad simpliciter *Medicam Pharmaciæ* pertinentibus, onerantur; *instructionibus* tumultuariis de efficacia & usu talium, ad hujusmodi *administrationes* animantur: & ita verè ad *Medicam Praxin* inducuntur. Quæ concessio non solùm, sed potius vera *constitutio*, in posterum nunquam amplius ipsis extorqueri potest, quo minus notum illud Brocardicum occinant, *quod semel placuit, semper placeat*: dum scilicet, vel non possunt per imprudentiam, vel non volunt, distinguere, tempus *necessitatis*, cui sæpe aliquid indulgendum sit, quod minimè deceret, si mutari posset; & tempus *commoditatis*, quo, quicquid *potest* mutari, meritò etiam *debet*.

XVII.

Enim verò, facile esset *rationi & intellectui*, bona hic Consilia invenire, si tam prona etiam obtingeret *voluntas*, ad illa in effectum deducenda. Chirurgorum *Castrensum manipularium* constitutio, si non caderet in famulos, nuper è constrina emissos; Chirurgi *chiliadum*, (*Regiments-Geldscherer* / rer/)

rer/) si verè periti, & bono iudicio atque prudentia instructi, eligerentur, & *turmales* illos, sub sedulâ inspectione & honesto obsequio haberent, & quam maximè juniores horum, sæpè adolescentiæ annos vixdum prætergressos: *temeritati*, nec ipsi indulgerent, nec ab istis illi locum dari, quasi connivendo, aut negligendo, tolerarent: plus *communibus*, quam *propriis*, commodis, tribuerent & invigilarent: tranquillioribus adhuc rebus pensitarent, quid in *casu*, & ingruente *necessitate*, consilia implicante, velut in numerato habere expediat: Posset ex unâ parte sperari, quod, contrariâ ratione obtinente, etiam optare supervacuum est. Rectissimè vero etiam ageretur, si simpliciter potius *postulata* ipsorum Chirurgorum, pro instruenda *cista* sua, audirentur, & *moderatione* potius peritâ, quam *accumulatione*, ad effectum promoveretur.

XVIII.

Ex alterâ vero parte, (quamvis pariter dubium, an votis adhuc pateat locus,) non certè Chirurgiæ, aut Medicinæ *campestris* seu *militaris*, sed totius *Artis Medicæ*, quam maximè interesset, ut verior aliquis conceptus, imò verior aliquis *conceptus didacticus*, tam *consensu publico* formaretur, quam *autoritate* deinde *publica* firmaretur, quid *certius*, *parabilius*, *securius*, & ab *errorum* periculo remotius, mandari & committi possit Chirurgis talibus *legionariis*, aut plane *prætorianis* (den Stabs-Feldscherern/) quod *usitatissimis morbis castrensibus*, non solum dictis modis quadrare possit, in sua substantia: verum etiam maximoperè, de *Methodo* denique decernendâ, tanto certior aliqua cynosura inveniretur. Quandoquidem absolutæ certitudinis illud omninò est, quod *Methodus*, si non planè omnium, certè tamen plerarumque medicationum, adeo vera sit *anima*, ut sub hujus verè *artificiosa* ordinatione, multis, aut variis, Medicamentis, ita parùm opus sit, ut proptereâ tanto minùs locus patere possit, ad varias, & inprimis temerarias, offensiones committendas. Cujus interim spei,

imò voti solius, immane antifacoma utique *duplex*, reluctatur, ex intimis *medicæ scholæ* penetralibus, nempe 1.) *Dissensus*, vix non per singula capita, de *genio & indole*, & consequenter etiam instituenda *tractatione*, tum aliorum *interiorum* affectuum, tum inprimis *Febrilium*. 2.) Huic confusio*n*i ex parte, partim tamen etiam frivolæ credulitati, circumspecta experientia cassæ, innitens Phantasia, de *immensa efficacia* rerum medicamentosarum, in *substantiam* humorum, aut *sexcentarum* illarum potentiarum salinarum & sulphurearum: quales effectus dum *materiali* contactu, & actu *mechanico*, edere posse & debere, finguntur, justissima atq; planissima hinc resultat illa subsumtio, quod ad tales effectus, nulla magnopere *methodo* opus esse possit. Nos vero certi sumus, & commendamus etiam animadversionem cujuslibet solertiæ, quod hoc scandalum, revera solide è *Medica* scholâ profectum, etiam Chirurgis multiplicem occasionem ad varios temerarios ausus suppeditet; dum evidentissimum certè est, quod hi homines, ea superstitione de veritate talium persuasionum securos atque certos sese reputent, ut certe Evangelio majorem fidem habere non possint. Unde etiam certissimum est, quod communissimè, etiam in extravagantibus ausibus, nihilominùs in *bona fide* versentur: persuasi nempe omninò, quod *Remedia* talia, *Experimenta*, imò *Arcana*, non possint solùm illud, quod ab ipsis expectant, absolvere & perfectum dare, sed etiam citrà multas ambages, nempe peculiarem justam *methodum*.

XIX.

Has tenebras discutere, esset profectò ingens operæ pretium; *definire*, inquam, tandem, & firmiter *statuere*, quibus Remediis, & quantum quidem fieri potest, (& quid non possit?) *paucis* numero, verâ fiducia inniti, iisque scopos necessarios exequi, & omninò assequi, Chirurgus valeat: Et quid tandem verè ita à *Medicamentis* sperare debeat Chirurgus; quid vero à *Methodo*, id est, partim *ordine* agendi, partim ipso *tempore*, iusta hujus *expectatione*, patiente *modestia*,

petendum sit: Et quousque tandem, magis solùm *privativis* effectibus, per *impedimentorum* interceptionem propriam Naturæ energiam expediendo, bonos effectus impetrare potius & sperare sit integrum; quàm vanis, & simul audacibus præsumtionibus, de summa *positivâ* efficacia Remediorum, temerè inflatum, ubique *urgere*, *onerare*, *turbare* Naturam, partim *ineptis*, partim activitate *aliena* adhuc amplius *nocituris*, materiis. Sed vereor, ne etiam votorum pigere nos debeat, quod *inania* vota concipientibus, jure meritoque evenit.)

XX.

Quamlibet autem qualiscunque incommodus ille eventus, satis in oculos veluti incurrat, dum nimirum Chirurgi tales *Castrenses*, & imprimis legionarii, *jus quæsitum* prætexunt; dum publicâ autoritate, non manualet solum, & *medicam* Chirurgiam, sed omnino *Medicinam* ipsam, in totarum *Chiliadum* salutem, exercere idonei declarati, & hæc officia omninò demandata ipsis, fuerint; A quo vero tempore, non potuerint illud, quo se Magistratibus tum temporis probaverint, dedidicisse; sed potius, locupletiore experientiâ, confirmati magis hucusque atque illustrati potius sint, &c. Habet tamen omnino prudens harum rerum æstimatio justam atque solidam exceptionem in eo, quod 1.) illis, qui verè solidam *peritiam* allegare possunt, eamque etiam usu ipso hucusque probatam dederunt. hoc in genere nulla quidem quæstio status moveatur, circa *communes* affectus, quales *inter arma* evenire possunt, *Vulnera* recentia, *Contusiones*, *Suppurationes*, *Fracturas*, imò & *Ulcerationes* simpliciores, *Ambusta*, *Luxationes*, & *subluxatorias distorsiones*, & super talibus rebus coorientes *Tumores* merè magis externos, &c. Interim circa illos casus, qui magis ab *internis* causis, vel nati, vel proximè sustentati, intelliguntur, & in *militaribus* occasionibus, provenire non facilè solent aut possunt, & partim indigent *Pharmacia* Chirurgica, partim vero non indigent, imò vero

non ferunt illam : utroque vero modo, peculiarem *circumspectionem* atque *cautionem*, & *methodum* maximè peritam, postulant: qualia sunt *Ulceracacoëthea*, *Tumoresphlegmonodes contumaces*, *Scirrhi sanguinei*, inprimis autem in partes *glandulosas* innidulati, *Erysipelata*, ab *interna* quadam *apostasi* extrorsum *protrusa*, & ex his rebus nascentia *cancrofa*, *phagedænica*, *cavernosa*, tandem *sphacelosa*, *Ulceracum spasticis doloribus*, *congestionibus* vulgo dicto *affluxu* humorum, cum *cacochymia* subjecti singulari, *prægressis* proximè *morbis* quibusdam, eorumque insufficiente percuracione : *Fœminis menstruarum* evacuationum vitia perpeffis, *Viris hæmorrhoidariis*, aut ad talia pathemata *propendentibus* ; ex aliis, etiam *ulcerosis*, aut alio quocunque modo p. n. *evacuationibus*, diu tamen *adsuetis*, tandem in hujusmodi consecuciones prolabentibus : Nedum quibuslibet *œdematosis* tumoribus, *antiquis* ulceribus, non solum *longo*, sed etiam *longè profecto*, *affluxu* sustentatis, *doloribus*, *tumoribus*, *ardoribus*, *rheumaticis* & *arthriticis* : *ulcerosis* emersionibus, à *cacochymia* velut ejectionibus, secedentibus, & procedentibus : in *tenerarum* partium, & facile in irreparabilia damna prolabentiū partium, *Oculorum*, tractatione suscipienda ; horum, *Aurium*, *Dentium*, pathematibus *consensualibus*, *rheumatico-hemicranicis* : *Luis venereæ* curationibus, tam per *methodos sudorificas*, quam per *salivationem*, in subjectis *tenerioribus*, inprimis *sexus feminini*, nedum plane *gravidis* ; aut *tenerioris ætatis* subjectis : &c. In talibus, inquam, casibus, tanquam *pristinæ* illorum *commissiõni* minimè probabiliter subjacentibus, adeoque neque *demandatis* neque *concredit*is, non habere, quod ad illam provocent, in propatulo est.

XXI.

Quod autem penitus, Medicationes *directè pharmaceuticas* concernit, cum notissima sit ratio *committendi*, 1.) quod *necessitas* quædam civilis, *Medici castrensis stipendiarii* institutionem impediat : 2.) etiam *morbi castrenses*, qui *inter-*
nam,

nam, *pharmaceuticam* curam postulant, non ita absolutæ sint certitudinis, quin melior spes illos etiam *non eventuros* esse, locum obtineat, adeoque commissio ut *in eventum*, ad absolutum *mandatum*, transferri, *positivè*, non possit: 3.) Morbi etiam illi, qui propriè ut *in castris* cooriri possunt atque solent, *pauci* potius sint, & *certi*, quam multifarii, nedum promiscuè omnes: 4.) etiam conditio *subjectorum* ipsis concreditorum, *de rusticâ*, & alia *laboriosâ*, & *adsuetudine* induratâ, *plebe*, & certè *in morbis*, nullis *diætæ* erroribus, luxuriosis, aut immo- rigeris, expositâ: & si verum æstimare velis, etiam non tanti æstimata, dum velut ad eventum & aleam *fatorum* emta atque destinata censetur: quod in *Politiâ* & civili conversatione constitutis, nusquam pariter applicari potest aut debet: quin etiam 5.) *quorum* talium morborum experientiam nâcti sunt, & illam etiam postcâ, adhuc in aliis subjectis rectè procedentem ostendere possunt: inprimis autem nihil *inconsiderantiæ* aut *temeritati* in methodis illis suis indulsisse observantur: circa talia affectuum genera, posset ipsis eousque indulgeri, si *moderationi* insistant, & etiam ultrâ, omnem justam reprehensionem evitent: 6.) Ubi tamen etiam *ordinariorum* Medicorum, Praxi, *publicâ* autoritate præfectorum, adest copia, ibi Chirurgos hos, antiquam suam *commissionem* tam parum prætexere posse, vel ipsis iudicibus, notum est, quam si quisquam alius, qui alibi officium aliquod exercuit, eique omnino recte par est atque sufficit, proptereâ hoc ipsum etiam *ubique* exercere & velut arripere vellet, in præjudicium non solum illorum, qui jam ibi ad hunc actum constituti sunt, sed quàm maxime eorum, qui hos constituerunt. Unde certè, quantumcunque etiam habiles, nisi *Privilegio* seu concessione *expressâ*, jus hoc ipsis pro certo districtu iterum collatum atque tributum sit, vel nullam habebunt, vel â conniventium arbitrio pendentem, *precariam* libertatem.

XXII.

Unde quidem talia merita sua allegantes, harum rerum commonefacere, & elencticè quidem, nempè cautionis nomine, convenit; ut tam ab usu minùs liberali & modesto, quam à methodorum *temerariarum* ausu, & *contraventionis* in hoc genere exemplis, abstineant; aut alioquin in ordinem se cogi, & posse, & debere, commeminerint.

XXIII.

Quamlibet autem reliqui *triviales* Chirurghi, & ipsi *turmalium* solum *castrensi* officio functi, non promiscuè omnes deterioris conditionis haberi mereantur; quin etiam inter illos, tam *ingenio* bono, *industriâ*que & *solertiâ*, quàm itineribus, *consortio* peritorum magistrorum, & ipso solertiore longo usu, destinationibus suis satis pares inveniantur. Interim, uti bono jure universum hoc, quicquid *Chirurgo* etiam optimè perito, tamen *ut Chirurgo*, competit, minime extendi potest ultra ea, quæ proximo §o determinavimus; adeoque intra hos limites sese continere, omnino boni atque periti Chirurghi, certissime debeant: tantò minus vel hoc idem, nedum quicquam *amplius*, indulgere jus fasque erit talibus, de quorum sufficiente experientia, & quam maximè *circumspectâ* solertia, vel nihil dum, vel *contrarium* plane, innotuerit atque constet: sed qui potius exèmpla præbeant antiquæ illius notæ, quod *imperitia temeritatem* pariat.

XXIV.

Sicut autem Medicorum hic interponenda autoritas, in primis apud verè *arrogantes* atque *temerarios* Chirurgiæ usurpatores, parum propemodum aditùs invenit; imò ne vix quidem, si etiam Medicus publico *Poliatri* munere, Chirurghis etiam, expressis verbis veluti, *præfectus* sit; meminerit propterea Medicus, ne utique totus conatus in irritum, imò in pudendas illas mutuas *altercationes*, exeat, ut potius primò moderatiùs Chirurgum, meritò *suspectum*, aut manifestius dehortatione ejusmodi dignum, commonefaciat, eique

abſtinentiam ab inconvenientibus, & ipſum non decentibus, aſſibus inculcet, & quoad ejus fieri poteſt ipſi perſuadeat. Sin autem, in primis palam & *protervè*, *temeritati* inſiſtat, denunciet maturè Medicus univerſam rem ordinario Magiſtratui, ejusque deſuper officium imploret. Quod ipſum, ſi debità cum modeſtià fecerit: imò, ubi oblivio, aut aliquid ſimile, interveniens, effectum optatum interverterit: licet cum eadem modeſtià, tamen cum ſerià etiam allegatione, laborantis ſub hoc negotio, ex demandato ſibi officio, conſcientiæ, inſiſtat, ut memoria factæ à ſe petitionis refricetur, atque ita tota res tandem effectum ſperatum fortiatur. Sin minus, obteſtetur, ut publicis monumentis, hæc ipſius *ex officio* adhibita induſtria, in futuram ſui excuſationem, inferatur.

XXV.

Cum autem notius jam ſit in vulgus, quàm ut diſſimulatione palliari poſſit, opprobrium illud, paſſim etiam ad propudioſam veluti impudentiam exorbitans, ut *Medici* inter ſe *mutuò*, & cum *Chirurgis*, contumelioſas *altercationes*, & *calumnioſas* imputationes, reciprochè exerceant; non ſine graviffima ſuſpicionem, *odii* potius, *invidiæ*, & *proprii commodi aviditatis*, animum impellentium, quam veritatis ullo veluti reſpectu: quæ res proinde etiam paſſim, juſtas tandem etiam querelas, ut à leviori autorum fide, tantò facilius negligi efficit: præterquam quod etiam revera *conſcientiam* excutere, deceat omnino & conveniat, ne quid in hujusmodi caſibus malè fundatæ *ſuſpicioni*, aut nugaci *delationi*, ita tribuatur, ut injuriâ, Chirurgus, aut quicumque alius, inde ita certè gravetur, ut & fama ejus, & conſequenter patientium fiducia in illum, adeoque tandem vitam ſuam honeſtè ſuſtentandi ratio, inde in diſcrimen adducatur, non conſentiente interim ipſa *veritate*. Cui rei ut rectè conſulat Medicus, caveat 1.) veluti *captare* quaſlibet occaſiones, in primis *leviores*; aut, 2.) quia *gravia* ſemper expectare, nec ipſum ſecurum aut conſultum eſt, incipiat propterea maximè à talibus, *gradus* admonitionis

nis exercere ergà ipsum Chirurgum; & agat etiam hoc, ea modestiâ & humanitate, quo Chirurgus sentire atque persuadere sibi ipsi possit, quod nullum aliud subsit propositum, nisi & patientium salutis, & conscientiæ, & sui ipsius integræ famæ, tempestivè prospiciendi atque consulendi. Quam certe rem cujuslibet prudentiæ equidem relinquendam, sed etiam certe commendandam, omninò arbitramur.

XXVI.

Quemadmodum autem Medicationes *purè Pharmaceuticas*, ad *morbos*, Chirurgiam plane non respicientes, suscipere, Chirurgo, in civitate posthàc viventi, (si vel maxime in *castris* per jam supra notatas causas atque circumstantias, ad id temporis, non *permissum* solum, sed planè etiam *commissum* ipsi fuerit, ad suppositos inprimis *certos* casus,) nullo jure aut prætextu competere potest; Ita neque competit tamen etiam eidem, quasi *purè chirurgicas* operationes, tamen in casibus *Medicinam* strictè dictam *Pharmaceutico-Therapeutica* concernentibus, temerè suscipere atque exercerè, nisi de *consilio*, imò potius expressa *postulatione*, Medici. Loquor autem de *Venæsectione*, quomodocunque tandem *ægris*, inprimis tamen *acutâ* aliqua invasione correptis, adhibendâ. Cum enim per ejusmodi cœptum etiam in genere, nedum autem per intempestivum insuper ejusdem usum, facilè ingens periculum, imò potius nimio certius damnum, hujusmodi *ægris* conciliari possit, erit certè tantò magis justum atque æquum, imò potius necessarium, præcavere, ne Chirurgi, propter exiguum lucellum, vere mercenarium, patientes temerè in discrimen adducant, imò plane in verum, quin vel summum, damnum conjiciant. Unde quidem inprimis in morbis *acutis*, *publice grassari* incipientibus, *Medici*, ab officio & autoritate ipsius *Magistratus*, omni jure hoc expetere possunt, ut publico decreto, ab hujusmodi actu, *sine Medici jussu* suscipiendo, Chirurgis interdicator.

XXVII.

Cum autem illi, qui Medicæ *Pharmaciae* jam audaciùs manus injiciunt, inprimis *intemperantiora* quælibet, & vehementer agentia Remedia ament; *Vomitoria, Purgantia, Mercurialia salivatoria, acriora Diaphoretica*, non solum Medicamenta, sed etiam insuper *Regimina* sudorifera; & talia, ut sine intellectu, ita etiam sine consideratione decente, diversitatis *personarum*, earumque *virium* tam in genere, quam præsentium in specie, injungere sueverint: Habet propterea certè Medicus, quod hic justis animadversionibus atque præcautionibus, notet, & seriò ab hujusmodi coëptis revocandos, aut secus coërcendos, iis, quibus jus fasque est, indicet atque commendet.

XXVIII.

Sicut autem jam suprà quoque, non æque paucissima protulimus, de illis casibus, nominatim, quos Chirurgum solum, sine Medici consilio, in se suscipere non deceat; & rationes etiam adjecimus, nempe, quod in illis plus invigilandum sit humorum dyscrasie, non tam æque semper *universim*, per totam sui massam, quàm etiam *privatim*, intra ipsum locum, ubi stagnant aut hærent, corrigendæ: Id quod non per Chirurgiam, sed simpliciter *Pharmaciam*, fieri debet: Ita placet hoc ipsum adhuc semel percensere, & aliqua, quæ nominatim Chirurgis non simpliciter hic competant, notare. Sunt autem hujusmodi affectus, *Cancer*, tam *occultus*, quam *ulceratus*. Cum enim *occultus*, medicamentorum applicatione longe faciliùs, quam spontè sua, in duplex insigne incommodum, imo certius damnum, adducatur, nempe 1.) incrementum seu *augmentum* insigne; 2.) ipsum actum ulterioris intimioris *corruptionis*: quorum utrumque, & inprimis quidem posterius, ita comparatum est, ut, usitatis mediis atque methodis, longè certius eveniat, quam non eveniat, adeoque tantò magis necessaria utique sit cautio, ne intempestiva hujusmodi tentamina, illud, quod ita veluti communissimè perpetrant,

trant, etiam reverà in effectum deducant; interdicendum hinc meritò est Chirurgis, à *temerario* eorundem usu. Jam verò, eum Chirurgi, (& velit Deus, ne etiam aliqui Practici Medici paria agant!) potiùs omnem occasionem prompta sua officia offerendi, nempe aliquid à patiente collucrandi, captare soleant; cujus totum contrarium ipsis præscribit, certa illa, non tam ambiguitas, quam potius ruina in deterius, è frivola talium affectuum irritatione, si veram atque solidam scientiam, & huic innitentem conscientiam, præ oculis habere vellent: certè, quicquid hic libera voluntas negligit, id monitis, imo si necesse sit seriis interdictis, ut servare meminerit, adigenda est.

XXIX.

Quemadmodum autem principiis ob stare, & occasiones malorum evitare, subinde & factu facilius est, & omnibus modis exoptabilius, quam enato jam malo atque damno, remedium demum parare; ipsæ vero etiam recentiores adhuc ejusmodi *coacervationes*, v. g. *cruentæ*, circa *glandulosa* præsertim loca, & nominatim *mammæ* muliebres, vel in ulcera magis magisque *cacoëthea* propendent; vel, cum adstrictione aliqua seu *repulsione*, disquisitioni dicatorum pharmacorum interventu, in *scirrhus* ejusmodi obfirmantur, adhuc pejorum morum ulcera semper parturientes: Expedit propterea reverà, ut etiam hujusmodi primò oborientes demum stases, proprio ausu aggredi Chirurgus minime in se suscipiat. Id quod tantò magis justum est, ut, inquam, ab hujusmodi affectibus, ita simpliciter per externa tentamina tractandis, Chirurgus tantò curiosiùs abstineat, quanto ab intrà *extrorsum* congestio illa procedit: utpote quo in casu certissimè longè profundius *introrsum*, exilibus vasculis impactum hærens *coagulum*, aut *grumi* sanguinis, quando jam *corruptio* inducitur, velut incoërcibili progressui ad *intima*, veram portam aperiunt. Unde occasiones tales exacerbationis per minus consultos ausus, tantò solertiùs vitari debent.

Minimè autem etiam minore adeò cautione opus est, tum in simplicioribus *Erysipelaceis* inflammationibus, juxtà vulgus Chirurgorum, jam per Emplastica, jam per *Epithemata*, imò *Cataplasmata*, tentandis: tum tanto magis in *phlegmonodesi* talibus: qualia vix non perpetuo sunt illa, quæ simplicius pariter *ab intra*, ortum sui & progressum duxerunt, præsertim cum insigni *commotione totius*, *horroris* & *caloris* paroxysmo: nedum quando, cum adhuc majore tumore & infarctu profundiorum partium, malæ cujusdam *ἀποσάσεως* modo, post acriores *febres Rheumatico-inflammatorias*, repentino quodam *impetu*, in artum aliquem fiunt. Cum enim hujusmodi decubitus, in primis adhuc recentes, inconditis externis pharmaciis, satis facile iterum ad *interiora compellantur*; à quo eventu etiam *mortis* periculum cooriri potest: Habet certè propterea tanto minus locum, temeraria aliqua, neque circumspecta, nec in genere bene fundata, tales affectus aggre-
diendi audacia.

XXXI.

Quid, quod etiam Ulcerationes *ichorose*, tum *cutis* ipsius, tum substratarum partium *membranofo-tendinosarum*, aliquam portionem afficientes, ambitum, aliquando satis latè circum, licet non *erysipelaceum*, tamen nulli rei magis affimilandum, aut profundius tumentem, *phlegmonodem*, formantes & foventes, (ubi in *primo* casu, cutis circumcirca leviter *turgida*, & abolitis omnibus rugis aut lineis, *nitida*, *roseo* colore conspicua, cuticulam ita molissimam tenet, ut levi scalptione rumpatur, & inde spongiosa illa cutis substantia, non solum statim acrem humiditatem ploret, sed etiam citò novum ulcusculum efformet; licet etiam spontè exiguas postulas purulentas concipiat, quæ deinde ruptæ statim ichorosam talem saniem concipiunt: *posterior* vero constitutio, profundiorum intumescentiam duram, cum variante sensu ardentis caloris, formans, sustentat interim perpetuam largiorem

ichorofam manationem totius ulceris.) Cujusmodi in anteriore parte *tibiarum*, aut juxta *articulationes*, à præviis *Contusionibus*, subnascuntur: Tales, inquam, usitatissimis Chirurgicis formulis vexatæ, obfirmantur ad minimum eò usque, ut etiam per plures annos durantem eandem constitutionem *perpetuæ manationis*, incoërcibilis ulcerosæ *repullulationis*, aut si impetu aliquo coërceantur, graviorum intimiorum nocumentorum, *ossa* ipsa aggredientium, eventum fortiantur. Aut, inprimis *phlegmonodea* illa, latius latiusque sese extendant, & ulcerationes antea simplices, *sinuosas* atque *cavernosas* efficiant, succedentibus hinc inde novis foraminibus, pluribus, aut ad minimum in prægressorum locum aliis cum ossium tandem carie. Hujusmodi Ulcerationes, quæ, quantum ad Chirurgicam *Pharmaciam* attinet, inprimis adhuc recentiores, aliquot nummorum, aut ad summum denariorum impensa, & satis exiguo tempore, corrigi possunt; communiter usitatis autem Chirurgorum formulis, veluti communissime in deterius deducuntur: certè propter hoc ipsum, talium imperitiæ relinqui minime debent. Judicari autem hæc potest, tanquam lapide lydio, ex eo, si ad summum trium septimanarum spatio, non sensibilissimè atque constanter quidem ita in melius conversa sit *posterior*, aut sanata *prior*, constitutio, ut ocularis inspectio, præter euphoriam sensilem patientis, iudex esse possit. Sin autem stolidi illa phantasia, quod refractaria *manationum* talium indoles, jam *scorbütica*, jam *salsa*, (es sey so ein gesalgener Fluß dazu geschlagen/ fabulantur,) jam *acrioribus*, jam *subadstringentibus*, aut ut illi volunt *desiccantibus* Emplasticis, (Dörrbänder/) jam *Mercurialibus*, exagitant, *inflammantur* Ulcerationes ipsæ magis, augetur *affluxus* atque *tumor*, erumpunt pluribus *foraminibus*, jam *cavernosæ* cohærentes, jam sigillares plures, ulcerationes, seu foramina, fallen Löcher hinein/ narrant. Verbo, quantò plus illi audent, tantò pejus evenit Ulceri. Tales, à talibus abarrendi sunt, ut non solum *sumtibus*, per ipsos sumtus *augendis*, con-

consulatur ; sed etiam damnorum novæ introductiones , & patientium magis magisque difficilior salvatio , ita maturè vindicentur : priusquam *ossa* simul carie affici contingat ; & novæ gloriationi horum magistrorum materia eveniat, sie haben schon so und so viel Weinlein heraus bekommen : pessumdata prope modum in perpetuum , inprimis circà juncturas, omni spe, per quamlibet artem sanandi patientis.

XXXII.

Tumoribus *Glandularum*, quasi *strumosis*, *infra aures* æque, atque ipsis *strumis*, *promiscua* Chirurgorum tentamina admittere, non solum quotidiana experientia detestabile reddit ; sed vetat etiam peritorum Practicorum, cum omni circumspeditione atque cautione instituta, & tamen effectu passim destituta, tractatio : Dico *per Externa seu Chirurgico-Pharmaceutica*, Remedia. Si quis autem *peculiare* aliquod Experimentum polliceatur, ejusque *specimina*, jam à se *præstita*, sistere possit ; aut ad minimum, patientes, quod satis sæpè usu venit, spontè sua illi se submittant : Non debet talis à prosecutione suæ artis arceri ; sed sufficit admonere, ne plus in se recipiat, non solum quàm ipse præstare, sed etiam patiens sine damno tolerare, possit. Siquidem eximie utique illud, non solum in *Chirurgia*, sed ipsa omninò *Medica* etiam Praxi, observandum venit, sed & cavendum, quod oppido rara sint ejus generis *tentamina experimentalia*, qualia vulgò decantantur, *hilffts nicht/ so schadt es nicht* : Cum niminò familiarius atque certius sit, ut, si non juvent, aliquid *damni* incutiant. Quando vero semel iterumque ausus talis artificis, non tam solum *in cassum*, sed etiam in aliquod sensile *incommodum* patientium, exire observantur, non æquum solum, sed certè justum est, & Reipublicæ interest, ut ejusmodi ausibus ipsis interdicator.

XXXIII.

Ita etiam circà *fungosas* illas *Excrecentias*, intrà *articulationes* graviter contusas, & cum contusione *luxatas*, pollulan-

lantes, *Ullied-Schwämme* quibuslibet opinabilibus tentaminibus indulgere, quorum nullam certam *experientiam* docere possint, nequaquam liberè permittendum ipsis est Chirurgis. Circa omnes autem etiam *fungosas*, *membranaceo-ligamentosarum*, aut *glandulosarum*, partium excrescentias & *tubera*, *Pharmaceuticæ* Chirurgiæ, per quantumcunque *Corrosiva*, *Cathæretica*, aut *Metallica Septica*, non temerè laxandæ, nedum detrahendæ, sunt habenæ. Sicut etiam vel in *carnosis luxuriantibus* Excrescentiis, diligenter monendi veniunt, ne vel *acrioribus Cathæreticis*, totum affectum exacerbent; vel dum his student, *æqualem mundificationem* totius superficiei ulceris negligendo, nihil certius, quam absumptæ portionis *repullulationem* experiantur: aut, firmioribus *Compressionibus*, totam partem affectam *suffocent*: aut contrà, diutius neglecta *exstirpatione*, graviores posthac *hæmorrhagias* expectare habeant: quibus ut consulant, iterum toti affectui præjudicia objicere cogantur.

XXXIV.

Ab *Oedematosis* autem Tumoribus, in solidum abstinere manus convenit; tam *Pharmaciciâ*, quam *Chirurgia* tentanda. Nempe *Scarificationibus profundis*, *Unguium ad vivum* resectione, & similibus consiliis, ad emittendam aquositatem: das Wasser abzupffen / inquiunt. Ita etiam à *Paracentesi*, proprio consilio & ausu instituenda, contineant manus. Ab *hæmorrhoidalibus fistulis*, sine Medicationum prævia & sociâ ope; ut & à *vaginæ*, aut ipsius *uteri*, *carcinomatibus*, per acres injectiones tractandis, prohibeantur.

XXXV.

Oculorum, atque *Aurium internarum*, vitia, Chirurgis, promiscuè, ne quidem ad *manuales* operationes permittenda sunt; minime omnium autem ad *Pharmaceuticas* medicationes. Siquidem etiam de reliquo satis periti, non solum bono *judicio* hic opus habent; sed etiam illa *cautione*, quæ multis quoque talibus non satis animo insidet, ut ab *acrioribus* teme-
rè

rè usurpandis, aut *continuandis*, quorum noxas non interciperere aut emendare intelligant, sibi temperent. Nedum, ut planè adversus *Suffusiones*, infra ipsam *tunicam corneam*, (quod sæpe usu venire vidimus,) in *superficiem* oculi, tanquam ad *pannum* aut *unguem*, pharmaca adhibere, ipsis liberum relinquatur. Quales autem aberrationes, vix non ordinariè, committantur, in ita dicta *Fistula lachrymali*, *purulentam* paucam saniem, (per *punctum lachrymale*) per vices exhibente, dum Medicamenta in *canthum oculi* inferciuntur, & ita *glandula* demum *violatur* & ad *manationes* deducitur, Programme jam pridem indicavit D. D. Præses.

XXXVI.

Ad frivolas *Dentium* Evulsiones, nisi patientes id ipsum flagitent *suo periculo*, jus nullum habent Chirurghi. Non autem exquisitè quoque exercitati, temerarium tentamen suscipere, quo deinde vel *maxillam* concerpant, vel *dentem* ipsum ita effringant, ut *radices* porrò auferri non possint, meritò etiam non admitti deberent; sed potius peritiæ suæ *certior*, ubi suppetit, advocari. Quid verò, quod ne quidem *Pedum Clavis*, sine admonitione *circumspectionis* debitæ, incidendis, omnes promiscuè admitti mererentur, &c.

XXXVII.

Ut multa brevibus complectamur, ubi tam plus *Pharmacidæ*, quam *manuali* operatione, peragendum venit; quam etiam *periculose* subsunt circumstantiæ, & metuendæ *consecutiones*, *manualium* operationum, ibi aliquid tale agendum temerè decernere, *proprio* nudo consilio & ausu, Chirurgis permittendum non est, nedum operationem ipsam ut ipsi soli administrent, tolerandum. Ad quem imprimis *posteriores* scopum, tam ipforum comünibus *legibus*, & *sodalitatis* constitutionibus, consonum est, quam vigilantiorum *Magistratum* adhuc specialioribus talium confirmationibus edictalibus consentaneum, ut ad minimum non *unus solus* tale aliquid in se recipiat administrare, sed potius unum, aut plures, de illius

loci *societate*, secum advocet, ut de *communi* consilio, vel ipso etiam subsidio, negotium absolvatur.

XXXVIII.

Ubi antè omnia illud observandum, &, quoad ejus fieri potest, in ipsum effectum deducendum est, ut antè *operationes* exercendas, ille qui ita adjungitur, *plenum* suum *consensum*, aut, quicquid *monendum* ipsi succurrit, disertè eloquatur. Si *dubium* aliquod tale inciderit, de quo bona fide inter se *consentire* non possint, alius adhuc, aut alii, ejusdem artis compotes, adhibeantur consultationi: Imò verò Medicus desuper consulatur. Ut ita calumniæ omni, à post facto intendæ, occasio præripiatur: quam, si ille spargere audeat, qui non *dissensit*, & ita *seriò* quidem, ut etiam, si sua sententia rejecta fuit, planè quoque *præsens* esse rei gerendæ detrectet, poenam calumniæ subeat.

XXXIX.

De reliquo verò, nec illa etiam inconsulta est via, quæ alicubi apud *Magistratus* observatur, ut Chirurgus, quando patiens ipsi occurrit, cujus curam in se recipere & rogatur, & detrectare non vult, interim de *incipiti* eventu, habere putat, quod bono jure metuat, ut *Magistratui* rem *denunciet*. Ea sine dubio intentione, ut vel ipse Magistratus, de adornanda plurium idoneorum *sociâ* consultatione, patientes eorumve assistentes cognatos, quin ipsum Chirurgum, ulterius commonefaciat: aut, ad minimum, tanto magis seriam atque sollicitam operam impendendam, eidem commendet. Et optandum omninò est, ut in primis *inferiores* Magistratus, hujus instituti satis memores se gerant, & Chirurgo quoque ad observantiam justam obsequentes habere, cordi habeant. Ad quem effectum etiam *Medicus* cordatus, in primis ubi *imperiorem* aliquem Chirurgum, *audaciorem* tamen simul, ut sæpè fit, novit, tantò magis Magistratum, oblatis occasionibus, modestè moneat, ne tam salutare institutum Praxi cassum maneat.

Aliquid autem meritò dicendum venit de imputatione illa vulgo usitatissimâ, quod Chirurghi *dolosè morari* & sustentare soleant, commissos sibi affectus, eorumque sanationem *differre*. Equidem verè hanc *malitiam* in aliquem Chirurghum cadere, nisi vulgò etiam perditorum esset morum, & notæ improbitatis, nunquàm potuimus animum inducere, ut crederemus. Si verò *doli suspicio* seponatur, per *imperitiam* atque *inscitiam* rem ipsam haud ita rarò evenire, Praxis quotidiana satis confirmat. Vix tamen planior est ad hujusmodi effectus via, quam si multum Chirurgus tribuat *Cathæreticis*; quibus non verè alienam & *luxuriantem* aliquam portionem, sed ipsius partis affectæ *substantiam*, aggrediatur: aut partem affectam, sub usu *Cathæreticorum* ad portionem aliquam meritò auferendam, non *præmunire* satis allaboret: vel etiam satis maturè, & *repetitis vicibus*, *inspiciendo* prospicere, ne Cathæreticum profundius quam deceat grassando, ipsam partem sanam ita violet. Ubi etiam temerarius usus *Mercurii præparatorum corrosivorum*, antè omnia *sublimati communis*, multorum hujusmodi etiam latius sese diffundentium malorum successuum autor observatur. Unde quidem non planè negligendæ sunt patientium querelæ, quando expressè in eum sensum formantur: Der Schade seye viel Tage lang nicht nur ruhig/ sondern auch/ dem Augenschein nach/ gar hübsch/rein/ und ohne merckliche Zufälle/ gewesen; der Barbier aber habe wieder etwas daran gebeiket/ oder etwas scharffes dazu gebrauchet/ (habe es scharf verbunden/ nugantur ipsi tonsores,) davon haben sie wieder grausamen Schmerken und Angst/ das Glied habe sich entzündet / Schwellst bekommen / der Schade werde aufs neu schlimm / können es so nicht ausstehen / werden doch noch um das Glied / oder dessen Gebrauch kommen &c. quod reverà sæpe cum lachrymis quiritantes audiuntur. Talibus in casibus, si patientes alterius etiam Chirurghi sententiam audire contendant, non denegare hoc ipsis potest talis operator; liberum tamen i-

psi manet, provocare ad *Medicum*, *peritum*, aut si se temerè gravari ab uno reputet Chirurgo, ad *alios*, aut totam *societatem*. Interim certum omninò & ratum esse debet, quod Chirurgus, *Cathæreticis* utens, quæ vel sua *energia*, vel *loci affecti indole*, *dolores* insignes, *ardores*, *inflammationes*, *intumescentias*, post se trahunt, omninò teneatur, *Medico*, aut *societati* suæ, aut *patienti*, coram idoneo aliquo & harum rerum perito arbitro, rationem reddere, quâ *necessitate* impellente, *Cathæreticis* utatur: & *qualibus*, & cur in *primis fortioribus* potius, quam *temperatioribus*. Quâ etiam non solum audaciâ, sed subinde libidine quoque, talibus insistendi, omni jure ipsi, ut *in posterum*, interdici potest, & *contumacia* adhuc subsequens, etiam serio coërceri. Siquidem hæc certissima omninò est methodus, ad *dolose* quoque exasperandum aliquod malum, & curam non solum *protrahendam*, sed tandem etiam plenam sanitatem penitus labefactandam.

XLI.

Enim vero rectissimè utique consuleretur *patientium* saluti, si *stabili Constitutione* sanciretur, ne in affectibus *tendinosarum*, *glandulosarum*, *vasculosarum*, in *primis arteriarum*, *ligamentosarum*, *nervearum*, partium aut portionum læsionibus, unus Chirurgus, sine alterius consilio & opera *sociâ*, tractationem in se recipiat. Prætereà etiam insignes *Luxationes*, antè omnia verò *ossis femoris*, nunquam sine *sociâ* ope aggrediatur; nisi forte longior absentia impediat, dum interiù *Luxatio tumore* graviùs obsideri potest. Neque vero etiam *duplicium* ossium, ut in *cubito* & *tibia*, *Fracturæ*, indignæ sunt, propter quas Chirurgus, non jam *repetito* usu similium casuum peritiâ instructus, alterius, sed ipsius quoque *non imperiti*, *sociam* opem sibi advocet. Antè omnia vero *Cranii* ossium violationes, neque sine *Chirurgi socii*, & *periti* quidem, concursu, neque sine *Medici* auxilio, *interno*, *Pharmaceutico*, temere à Chirurgis tractari debent: in *primis* cum notissi-

ma sit reciproca *conspiratio*, inter *caput* violatum, & *ventriculum* atque *primas vias*, &c.

XLII.

Ne verò ad *singularia* nimium operosè ulterius excurramus, esset omninò optandum, ut cum omni *diligentia*, sed & simul cum debito *candore*, & inprimis periclitantium patientium *amore*, seposita *emulatione*, *simultate*, *invidia*, *superbia*, debitâ observantiâ exerceretur Constitutio illa, aut in hunc sensum propriè ampliaretur, nempè, ut Chirurgus, tanto magis *junior*, si totus aliquis affectus, aut fontica aliqua symptomata, ipsi obveniant, cujus generis vel plane nullum adhuc *sub proprio suo consilio & opera* habuerit, aut feliciter *restituerit*, teneretur *seniorem* aliquem, aut notoria *dexteritate* atque *peritia* instructum quemcunque, in *adjectorem*, aut ad minimum *consultorem*, adsciscere, circa *directè* Chirurgicos affectus: Circa *Pharmaceutico-Chirurgicos* autem, sine consilio & consensu *periti* Medici, nihil audere. Quæ quidem posterior res, de solida ratione *juris*, etiam in illum sensum intelligenda venit, ut circa *Pharmaceuticam* Chirurgiam, in *dubiis* casibus, unus Chirurgus simpliciter, alterius Chirurgi consilio acquiescere non temerè debeat: sed potius Medici *periti* sententiam exquirere, si ille ad manus esse possit.

XLIII.

Nequaquam autem silentio præterire licet, sed potiùs tanquam specimen, hætenus circa *Pharmaciam* Chirurgis non permittendam, notare atque taxare convenit, licentiam illam, quam sibi sumunt vulgò, circa administrationem *Salivariæ* curæ. Ubi non solum ipsum *consilium*, seu quæstio: *An agendum?* injustissimam quæstionem venit; à Chirurgo ita temerè non decernendam: sed etiam ipsa in effectum deductio, seu administratio totius negotii. Ubi quidem ad Chirurgos omninò rejicienda est, *applicatio* Unguentorum mercurialium, sed tamen etiam potius dissuadenda inunctio illa, quasi jurata huic turinæ, secundum longitudinem *spinæ dorsæ*:

cum inunctio circa *carpum manuum*, & *tarsum pedis*, omnino sufficere possit; quæ insuper etiam ab ipso patiente, imò quocunque *mercenario*, (cum nullam *artificialem* enchirisin postulet, aut peculiarem dexteritatem,) satis commode exerceri potest. Interim tam parum ipsi Chirurgo, quam alteri cuicunque mercenario, liberum esse debet, *quantitatem* inunctionis ad nudum suum arbitrium instituere; sine *tolerantie* personarum, *magnitudinis* morbi, *virium*, factæ sufficientis *præparationis* corporis, prægressa debita ponderatione, & prudente discretionem. Imò verò præscribendum potius ipsis venit, ut nihil hic, cum ullo *impetu* agitare, vel audere, suscipiant; sed semper *placide*, nempe à parvâ quantitate, incipiant: neque intra secundum aut tertium diem, *repentinis* incrementis, velut extundere, & *impetuosos* inprimis successus, machinentur. Siquidem vix aliunde, necunde sanè certius, non molestissima solum illa, sed & subinde periculosissima, symptomata, immoderatarum *inflationum faucium*, *palati*, *linguæ*, *gingivarum*, *inflammationis*, *ulcerationis* harum partium, irrumpunt; quæ omnia, & inprimis *faucium* illa damna, *moderatis* successibus *impulsus* salivatorii, certissimè evitantur.

XLIV.

Minimè vero concedi Chirurgis debet, *internus* usus *Mercurialium*, sine præscitu *Medici*; qui tam de *bonitate* substantiæ, è *Præparatione Pharmaceutica*, satis securus sit: quam de *quantitate* moderatiore, & *successu*is potius, quam *simultaneis* dosibus, ordinandis atque definiendis. Ubi, sicuti prudens & peritus Medicus, à *Turpetho minerali*, *Præcipitatis* quocunque tandem colore absurdè fucatis, (præter *album* fortasse, è præcipitatione ex aqua forti per sal commune resultantem,) consultissimè abstinebit; contentus legitimo *Mercurio dulci*, quamvis nullum splendorem exhibente, dummodo etiam nullum usquam *saporis* vestigium offerente. Cuius moderatissimæ doses, ad ʒ. 6. grana, in corpus decenter
pre-

prædispositum, exhibitæ, *continuatione* aliquot dierum, rectissime satisfaciunt proposito scopo; dum salivationem *leniter* suscitant, & ad *progressum* etiam sufficientem deducunt: tanto magis, si per dies eò plures quotidianus illorum usus continetur, imò, pro verè perita æstimatione circumstantiarum in patiente, procedente jam rectè fluxu, planè ad unum aut alterum granum *augeatur*: Fluxus denique totus, ita sibi relinquitur, ut, donec sponte cesset, nullum *artificiale obstaculum*, aut quæcunque remora, ipsi objiciatur.

XLV.

Tantò magis autem, invigilare, justum penitus & æquum est, ejusmodi audacibus tonsorum quorundam cœptis, ubi *sine discrimine*, sine ullo, ne humano quidem, nedum perito, *judicio*, cujuscunque *staturæ, texturæ, virium, constitutionis* atque *temporum* morbi, subjectis, non solum, ut *in genere, parem*, sed & præcipue *rudem* atque vehementem, *Salivationis commotionem* inducentes, ad minimum alia graviora pathemata conciliant; inprimis circa *fauces*, aut, corpore non satis decenter *præparato*, etiam circa *abdomen*: inprimis quando *Corrosivis* Mercurialibus præparatis, temeritatem suam exequuntur: quin denique planè funesti exitus temere aliquando inde resultant. Qualibus profectò casibus, (quorum inprimis priores, nusquam ita rari sunt, certè tamen neque posteriorum non uberiora quam optandum esset, exempla occurrunt,) illi Chirurgo justam dicam scribere, pro re nata poenam irrogare, ab ulterioribus autem talibus ausibus ipsi severè interdicere, & contraventionis seriam poenam prædicere, non justum magis & æquum, quam *omisisse* iniquum est. Quamvis autem, uti quidem non inusitatum est mihi Præsidi, insimulari fortè possem, quasi temerariis imputationibus, artificum existimationem, quam de se haberi contendunt, suspectam reddere gestirem, si dixerim, optandum esse, ut etiam circa *Salivationis* ausus, neque *Chirurgi*, nec ipsi *Médecini* titulo insignes, exorbitent: Tamen & mihi multò minùs

insolitum est, hujusmodi imputationem in solidum domum remittere; prolatis solùm, si res postulare videretur, apertis, non solum *vivis*, sed etiam *mortuis*, meorum assertorum *ex-emplis*. Qualium posteriorum unum, statim paratum ad manus esset, ubi *Juvencula*, nulla usquam malâ valetudine, (præter anxietates quasdam & cruciatus sub mensium erupti-
one,) conspicua, tenerioris texturæ atque staturæ, cum ipsi, non quidem à Medico, quamvis ille omninò una cum Chirurgo præstò esset, sed ab ipso Chirurgo, præbente tantùm omninò assensum Medico, per tres deinceps noctes, quindecim grana Mercurii dulcis, in singulas doses, data essent; obruta inde repentinis congestionibus atque commotionibus oppressoriis, & superveniente, quarto die, anxio illo erumpentium mensium molimine, (adeoque temerè suscepto hoc actu, sine usquàm in considerationem admissio horum fortè instantium tempore,) sub initium quintæ diei vivere desiit, &c. *Sed Hannibalis cineres terra Libussa tegit.*

XLVI.

Manuducit autem nos omninò hæc ipsa odiosa veritas, etiam ad illud designandum, atque connotandum, quod justum est, ad benè observandum, & in debitum effectum deducendum *officium* suum, ex parte ipsius Medici. Notum est illud, quod pueri inter scamna scholastica sibi invicem occinunt: *Turpe est Doctori, cum culpa redarguit ipsum*. Et certè, turpe est *Doctori*, si ille quidem ab effectu videat, malè cedere Chirurgi ausus; sed si deinde ad contradictionem, (ut prope modum audax est & impudens genus,) *imperiti* Chirurgi, negotium procedat, & talis audeat probationem in forma à Medico postulare, in quo *malè* egerit: imò quid aliud *melius* agi potuisset atque debuisset, (cum certo *rectum* sit *regula curvi*,) si Medico tunc hæreat aqua, fortunæ ludibrium est, uter causam teneat. Quamvis enim verum, & certè nequam, sit *sophisma*, disputatorium: *Si ego malè locutus sum, profer tu melius*; (cum utique propterea non possit verum evadere, si quid in se fal-

falsum existit, si alter non ipsum quod verius est, sciverit: sed omnino sufficiat, si hujus falsitatem docuerit, licet ipse novam veritatem, quæ ipsa objectum esse debuerat istius propositionis, non possit ipse definire:) præstat tamen non solum, sed convenit utique etiam Medico, ut ille etiam hoc ipsum didicerit, ut non solum *à posteriori*, quia malè exit, arguere possit operationis vitium: sed etiam *à priori* scire, quamobrem non potuerit benè cedere: adeoque etiam ab *oppositis* rationibus, quidnam ergo, & quale esse debeat, à quo *melior* effectus expectandus sit: aut in aliquibus casibus, quamobrem vix ab ullo remedio certum auxilium, interim à multis temerè susceptis etiam certum *detrimentum* expectandum veniat, exemplo *Cancræ*.

XLVII.

Ne autem quidquam etiam temerè dissimuletur, quod ad propositum nostrum scopum pertineat, cum consideratio nostra occupata sit, circa *Pharmaciam* præcipuè Chirurgicam, non temerè *operatoribus* ita permittendam, ut illi hinc tanquam simpliciter in suo versantes, quidquid in mentem venit, audendi libertatem sibi sumant; imò vel plane adversus meliora monentes, vindicare sibi atque asserere, contendant; tanquam circa hæc Medicus non habeat, quod ipsos informet, nedum reformet: Poteest quidem hujusmodi ineptiarum, tanquam simpliciter ad hominem, turba hæc convinci, si dicere jubeantur, quo intuitu seu quo fundamento subnixi, hanc illam *Compositionem*, inprimis *Emplasticam*, illis suis scopis destinant; aut quorum, ut vocant, *Ingredientium*, nomine, eximiam illam certam efficaciam inde securi expectent: quod dum certissime nesciunt, sed simpliciter ad *Experientiam*, aut receptam *observantiam* totius sui coetus, provocant, poteest ipsis ab hoc aditu fortè et modissimè præmonstrari, quod, quorum Remediorum non nisi *tralatitiam* commendationem, nullam autem intimiorem *realis* efficaciam, cognitionem habeant, qualis interim à Medico studio meritò expectetur, propterea etiam talium remediorum libera atque justa applicatio, non

F. sim.

simpliciter sit illorum iudicio committenda res, sed longe verius arbitrio Medici deferenda.

XLVIII.

Non placet autem hoc loco plus, quam paucis verbis notare, propudiosam illam licentiam, quam sibi aliquando sumunt Tonsores, in manumittendis famulis suis, aut potius magistralis concessionis mimis. Ubi *Emplastrorum coctionem* tanquam rem propriè ad suas manuales operationes pertinentem, etiam pro specimine à candidato suo exigentes, sædè inquam ita stolidas formulas eidem præscribunt, ut factum sit impossibile, aliquid non insanum inde reportare. Dum interim eo ipso tentare illum præ se ferunt, numquid etiam ita proprio suo consilio subvenire valeat defectibus, quò consistentiam *emplasticam*, utpote de quâ solâ propriè sermo esse debebat, eo ipso salvari contingat. Quo ipso nempe satis declarant, magis reportandæ tandem *formulæ*, quam informandæ aut efformandæ, per specierum *Therapeutice* idoneorum, coordinationem, totam illam suam, & quidem propriè ut suam, intentionem directam esse. Quo ipso tamen, quam parum vero scopo, nempe *efficacie* à tali Pharmaco sperandæ, consulatur; quin potius longè verisimilius ab huiusmodi propriis magistralibus ausibus, certior aliqua depravatio introducatur, minime injustum est suspicari.

XLIX.

Ut autem omnino rei ipsius veritatē, & posteritatis, si quæ futura est, consulatur usibus, illud antè omnia, cordata, docta, atque perita, pensitatione, imò potius evolutione, demonstratione, atque decisione, opus habet, *quidnam veritatis subsit, numerosæ illi copię atque panoplïe Pharmaceutico-Chirurgicę*. Ubi videlicet tot *Unguenta*, tot *Emplastra*, tot *simplicia* ipsi, non solum *externis*, sed passim etiam *internis*, *Vulnerariis* & *Ulcerariis* usibus, pleno gutture, & oratorio verborum lenocinio, dicata, (licet communissime nudis *tralatitiis* commendationibus innitente: etiam ulteriore qualibet tali assertione,) revera mererentur illam etiam universalio-

rem *Docimafiam*, veræ *utilitatis* æque, atque qualiscunque *neceffitatis*, quam toti *Materiæ Medicæ* turbæ, unus & alter Vir, certò bonus, ingenuus, atque cordatus, jam pridem destinaverunt. Ut nempè tandem definiretur, quibus, in fuis claffibus, revera *fidere* liceat: quo tandem solidè directo, tantò magis propter hujusmodi homines, quibus nudus *empiricus* talium ufus, non folum plane eripi non poteft, fed & non ita rariffimis exemplis atque cafibus, reverà committendus atque credendus venit; ut ibi etiam è *melioribus*, *optima*, & ex optimis *pauca*, juftæ fuæ autoritati affererentur, neque adeo opus effet *ignotis*, nifi de fola *fama*, & ipfo *numero*, ejusmodi præparatis, non folum fovere *confufionem* credulorum ejusmodi Empiricorum: fed etiam ufitatis illis Tragicis Panegyricis, fcandalum demum & lapidem offenfionis ipsis apponere.

L.

Speramus, neminem fore moderatiorum, qui vitio, feu potiùs invidiæ, nobis daturus fit, quod nos, præfente loco, hanc operam in nos non recipiamus. Eft nobis fermo de *Officio Medici*; Eft nobis adeoque etiam fatis, indicaviffe, in quo illud verfetur; de reliquo vero *modum* illud exequendi, cujusvis dexteritati, equidem commendare, fed etiam relinquere: tanto magis, cum Tractatio noftra etiam cancellos præ fe habeat, edendi magis fpeciminis, quam proprie docendi periculum faciendi: & inprimis in hac odiofiffima materia, *abusus* *laudationum* *Materiæ Medicæ* denotandi. Illud autem, inquam, omnino iterum, tam fincerè, quam confidenter, afferamus, digniorem effe hanc materiam, quæ unanimi confenfu, ftudio, opera, & tandem folertiffime collatis judiciis, certius definiretur, & tandem quanta fieri poffit autoritatis prærogativa, in ufus publicos ftabiliretur, ut huic inftituto vel mille curiositates, ad minimum tantisper, poft habere, æquiffimum omnino effet: Illius autem cœpti felix in effectum deductio, omnino maximæ laudi effe mereretur, arbitris harum rerum fcopo fuo tandem ita feliciter potitis,

32 sicuti publicis rebus generis humani, longe certe exoptatis-
 32 simum usum præbituræ.

LI.

Tanto facilius autem fortè foret, justam atque solidam *Methodiam*, Chirurgorum tribui ita præscribere, ut illam in gerendis suis negotiis, equidem in genere antè oculos habere, in specie vero etiam, prudente judicio, ejus executionem administrare discerent. Circumspectè nimirum, secundum diversitatem *affectuum* æque, atq; *corporum*, animum advertendo ad rationes *temporis*, & veros *successus* illorum eventuum, qui propriè tunc animo destinantur. Ne videlicet etiam hic, perpetuò suo reliquo more, simpliciter *è formula*, tanquam materialiter, & ut in genere, usurpantes ea quæ commendantur, de *tempestiva* singulorum *subordinatione* parum cogitent. Ubi nempè, reverà, inter ineptias, nudam atque crudam empiriam amplectentium, non ultima est illa, quod, si modo applicuerunt, quæ certo profutura ipsis persuasum est, nullam amplius rationem *temporis* aut *successuum*, aut *subordinationum*, cordi habeant; sed potius, si non statim sequatur, quod illi quidem putabant, vel de affectûs *indole* inanes sibi conce- tus forment: vel ab uno remedio ad alterum, & inprimis *potentius*, desultando, meliores, *placidiores*, eventus temerè interpellent; *intempestivas* subinde *commotiones*, sine causa atque usu, introducant, aut ad minimum magis legitimos progressus, confundant: adeoque undiquaque, alia perpetrent & impetrent, quam quæ conveniebat.

LII.

Habet autem talis justæ *Methodi* imperitiâ, reverà tantum momentum, ad pervertendum etiam passim, universum bonum *successum*, ut proinde determinatio atque inculcatio ejusdem, non solum utilis passim existat; sed etiam citra eandem, omnis certe labor in vanum recidat; aut quicumque etiam adhuc sequitur optatus *successus*, tardius & incommodius procedat, quàm debuisset & potuisset fieri: re ipsa vero Chirurgus ita *anomalam* hanc assequatur sanationem, ut in

posterum, pares alios casus, frustra eadem, *confusa* præsertim communiter, tractatione, superare, in animum inducat. Libet exempli loco nominare, supra jam tactum illum affectum, quando, & inprimis concalescente corpore, ab importuniore scalptione, aut à contusione ad notabilem excoriationem, in anteriore parte *tibiae*, enascitur Ulceratio aliqua, cincta lato quadantenus, sed tamen veluti levi, *tumore* cutis, rosei coloris, & *nitidae* consistentiæ. Ubi certum est, Ulcus illud, quantulumcunque etiam fuerit, nunquam cessaturum esse, aut constanter consolidatum iri, prius quàm cutis in ambitu ejusdem, dicto modo affecta, hanc constitutionem amiserit, & reliquæ universæ cutis sinceram consistentiam recuperaverit: quo demum impetrato, nullo negotio succedit ulceris ipsius sanatio, imò sponte quasi procedit. Quod alioquin, sub variis inanibus tentaminibus, jam *manationem* ejus *resiccandi*, jam *Balsamicis* sanationem introducendi, jam *tumorem* illum & *affluxum* quoquo modo *discutiendi*, jam, subinde *nigerrimam* superficiem ulceri evenientem *absumen-*
di, aut *acrius* abstergendi, &c. è simplici, in deterius conjicitur, aut certè de reliquo etiam patienter toleratum, nihilominus in plures etiam annos perdurans, passim invenitur. Quamlibet autem etiam in vulgaribus simplicioribus casibus, in *Vulnerationibus* gravioribus, *Defensiva* sua remedia; in *Apostematibus*, duriores adhuc *ambitum* *Emollientia* atque *Resolventia*: in *Ulceribus*, convenientia *Abstergentia* & *Mundificantia*, spei consolidationis præmittere, doceantur Chirurghi: obtingit tamen, certè sæpissime, deprehendere, quomodo minus adhuc periti, & sufficiente discretione destituti, circa has quoque res jam *præpostere* versentur; jam vero ad minimum *tempus*, & evidentiores suæ spei *succes-*
sus, recte dijudicare nequeant. Unde certè tanto magis commendandum illis esset, ut vel minus exercitatus peritiorem, vel quilibet tandem, *Medicum cordatum* atque *peritum*, super ejusmodi dubiis consalutet, eorumque illustrationem ita expetat.

Postquam autem ita, quantum satis esse possit, de vulgatoribus rebus Chirurgicis, inprimis autem *Chirurgico-Pharmaceuticis*, locuti sumus, circa quas non solum *competat Medico*, sed etiam *conveniat*, & quadantenus *incumbat*, & certò quidem in *publico officio Civitatis* aut *Provinciae*, constituto, *invigilare, praesumptuosis*, ceterum malè fundatis, ejusmodi ausibus: Ita veniunt adhuc pauca verba dicenda de peculiaribus illis *generosioribus*, & certe etiam singularem *Experientiam* in habitum deducendam exigentibus, operationibus, *Cataractae depositione, Herniarum, & Calculi Vesicae, exsectione & extractione*. Memorabilis hoc nomine reverà est, *Hippocratis* cautio, quam ipso suo *juramento* comprehendit; interdicens nempe expresse, & sub *jurata fide*, discipulis suis, à *Lithotomia*. Non quod simpliciter totam operationem rejicere, arbitremur; sed quod, cum ipse discipulos suos talem operationem non doceret, eamque non solum planè *peculiari*, & non apud unumquemque hominem promiscuè supponenda, *dexteritate* indigere, satis intelligeret: & tamen sub quantumcunque benè instructa operatione, *periculum*, tanto magis per *individuales* circumstantias, satis perpetuo certum, agnosceret: quod ita his maximè respectibus cavere voluerit *Medicinae* sectatoribus, ne *se, artem, & maxime patientes*, periculo exponerent: In quo etiam rectissime sine dubio egit.

LIV.

Quà videlicet occasione vitio nobis verti non poterit, si paucis attingamus, licet parva spes sit assequendi, illum usum, qui inde locupletissimus certè sperari posset, nisi duplex impedimentum obstaret, vix superandum. Loquimur autem de *Selectu*, 1.) ad Chirurgiam adhuc *discendam* magis idoneorum, 2.) ejus *exercitio* sese probantium, subjectorum. Equidem in omnibus artibus tractandis, summam esse hujus-

jusmodi solertiæ utilitatem, nemo sanâ ratione præditus negaverit; dum utique ingenii habilitas, non solum minus laboriosum reddit ipsum discendi conatum, sed ad penitiorum etiam objecti intellectum, & feliciorum habitum, unicè traducit. Cum ex adverso, humano arbitrio *distributis* & quoquo imperio, *injunctis* officiis, dum internam *habilitatem* ad optime administrandum negotium, humana mandata, aut quancumque favores atque gratiæ, tribuere non valent, vanus non solum sit omnis labor, sed, quod in humanis rebus pessimum, non solum *in irritum* recidat, sed *in contrarium* communissime, totum propositum. Si itaque etiam ad Chirurgiam *discendam*, adhiberentur mox idonea ingenia, & non ita promiscuè quilibet, quorum *parentibus*, aut *heris*, illud ita placet, discendæ huic arti addicerentur, melius sine dubio, & sæpius quidem, cederet spes, quam vulgo evenire deprehenditur. Cum autem hoc prope modum inane sit consilium, restat alterum; ut jam in Praxi versati, ejusque singulari *dexteritate* conspicui, dico, *publicè* per civitatem aut provinciam *notis* exemplis commendabiles, ea prudentiâ *foverentur*, & *invidiæ* atque *calumniæ* usitata adversus illos machinamenta, etiam severe *compescerentur*. Id quod certè multò facilius factum videri potest, quam *selectus* ille ingeniorum ut à priori, quæ ad minimum *morales* depravationes, posthac in transversum agere possunt. Interim, jam antè agnovimus ipsi, difficultates duplices; dum 1.) ad *Chirurgiam*, nempe *manualem* operationem, reverà talis *indolis* atque *ingenii* subjecta requiruntur, à quibus omnia, ad *amissum* quasi, iusta & æqua, adeoque etiam *prudentiæ* ex assè respondentia, expectari, nedum exigi, non possunt. Complecti enim debet tale *Chirurgicum ingenium*, *promptitudinem* ad agendum; non *intrepidum* solum, sed etiam reverà *audacem*, animi habitum; consilii quoque, ut inter suas res, capeffendi, animi *præsentiam*; & neque multæ *dubitationi*, neque inani com-

mi-

miserationi seu teneriori affectui, pronam & expositam animi dispositionem. Qualis animi habitus, inseparabilem quasi comitem habet alteram illam animi ideam, ut magis volatica, minùs composita, minùs assidua, minùs temperans atque patiens, magis autem obstinata, jactabunda, adeoque audiendorum aliorum consiliorum aspernabunda, concurrat indoles. Unde etiam, 2.) nisi laudatum illud à nobis consilium, tales homines fovendi, cum magna prudentia ad effectum deducatur, proximum est, ut insolentes, fastuosi, rixosi, imò negligentes, evadant: aut, per ipsam negligentiam, & confidentiorem audaciam, tandem magis magisque temeritati tribuere, in animum inducant. Unde quidem & bona fortuna opus est, & prudente ejus moderamine, si hæ res ad votum exire debeant.

LV.

Justissimum autem omnino est, & vero optimi Magistratus officio consentaneum, ut, sicuti malos atque refractarios coërcitio, ita bonos, reverà etiam favor, commoda, prerogativæ, præmia maneant; talia tamen & tanta, quæ non oneri, fastui, aut invidiæ, sed vero usui esse possint impetrantibus, eosque ad tanto majorem in rebus suis gerendis solertiam animare. Et fient hæc maximè, quando Platonis Respublica rectè constituta erit. Si tamen prudens Medicus, etiam, quantum in ejus potestatem cadet, seriam harum rerum rationem habebit, poterit fortasse etiam ipse momentum aliquod adjicere, quod ad auspiciatum harum rerum successum adjuvare valeat: qui nempe omnibus modis utique promoveri meretur.

LVI.

Ultimum autem in hoc genere, seu potius supremum, est omninò illud, cui totum quasi ædificium nostræ Tractationis superstructum est, adeoque nullo modo negligentius haberi pot-

potest aut debet. Est autem hoc, ut *Medicus* curæ cordi-
que omninò habeat, rectè intelligendæ, atque optime æsti-
mandæ *Praxeos Chirurgicæ Instrumentalis* studium; adeò,
ut licet *manualem* habitum ejus, neque possit, nec etiam
velit, imò ne quidem debeat, perdiscere seu acquirere: ta-
men *intellectum* sufficientem, atque *rationalem* usum & ha-
bitudinem illarum, optimè comprehendat: ut ita benè fun-
datum atque prudens judicium, de his rebus formare pos-
sit, (ubi etiam ineptis *præfigurationibus*, ipsi operationi de-
inde non facile conciliandis & applicandis, nihil tribuere,
meminerit,) ceterum autem etiam hac in re, semper *mitio-
rem* viam eliget, in admonitionibus, aut correctionibus in-
stituendis, inprimis *per initia*, & ergà homines non *obsti-
natos* aut *insolentes*, quos potius maturè, *Superiorum* curæ
atque animadversioni commendabit.

LVII.

Pharmacie vero *Chirurgicæ*, quantam usquam possit,
diligentiam adhibere, eamque sibi non solum notissimam
reddere, sed etiam *Theoreticam æstimationem*, usitatarum
formularum, prudente pensitatione optimè excutere; *Pra-
cticam* verò etiam efficaciam, ex observatione experientiæ,
solertissimè annotare & expendere, partium suarum omni-
nò ducet. Imò, uti facilè intelligere poterit, quod vera
atque solida *Ætiologia* seu *Pathologia* hujusmodi affectuum,
quibus talia remedia destinantur, vera sit *cynosura*, ad diri-
gendas *indicationes*, & quasi circumscribenda auxiliorum i-
doneorum requisita; ita studebit quidem quam maximè hu-
ic proposito, pro quo feliciter obtinendo etiam optamus i-
psi felicia auspicia, ad divinandum, *ubi* illam discere aut in-
venire debeat: Indicabimus interim etiam adminiculum a-
liquod, & rectificationem acus illius *magneticæ*, adversus
insignes declinationes, quibus alias etiam in genere, nedum

in specie, exposita est: Nempe, prudentissimam *observationem*, *agnitionem*, & *æstimationem*, præsertim in actualibus *continui solutionibus*, *Operationis Naturæ* ipsius, circa *structuram* partium adornandæ, regendæ, reparandam: ut inde informare possit intellectum suum, *quid* & *quantum* hic valere possit, *quousque* prodesse, & *quid* proprie tanquam *scopum* certum sibi proponere, *artificialis* intentio atque cura: *Efficere* verò, verè, & sine vanis nudis pollicitationibus, possit, energia ipsorum pharınacorum. Quomodo etiam insuper, subinde affectuum talium, tam *perniciori* durationi, quam *symptomatibus* pejoribus, occurrendum veniat per *interna Remedia*, tam *corrigentia* quā dantenus acrimoniam ferofam, quam inprimis ad justam *Discussionem*, & tandem ipsam *exonerationem* facientia. Quibus rebus plurimam lucem affundet antea commendata *vetior Pathologia Chirurgica*; seu verus conceptus de proprio *Subiecto Læsionum*, quatenus illud, sive *Sanguinis*, sive crassioris *Lymphæ*, sive folius tenuioris *acrioris Seri*, sive *salivalis fermentescentis* substantiæ, *aditui*, *detentioni*, *accumulandæ stasi*, & tandem ita variæ *corruptioni*, quā maxime patet: tum etiam ipsæ *Partes* continentes, magis aut minus *porosæ*, tonicis *stricturis* magis aut minus aptæ, adeoque etiam, eo ipso, ad *tolerandam* magis passivè, & magis magisque *receptandam*, materiæ copiam: aut contra, etiam *repellendam* jam factam *stasin*, simulatque per idonea *Remedia*, tam *corruptum* dometur aut auferatur, quam *retentum* tantum, adhuc minus corruptum, ad sufficientem fluxilitatem reductum sit. Ubi insuper, *Temporis* habitum, tam ad *subigendam* materiam, quam etiam ad *corrumpendam*, & tandem ad ipsos *successus* dispulsorios, tam ratione quam experientia metiri, & hanc rem optime perspicere, & perdiscere, cordi habebit.

In *Manualium* autem *Operationum* *Directione*, ratio-
nem habere meminerit, *Situs Vascularum*, insigniorum funi-
culorum *nervosorum*, *Tendinum*, *Musculorum* ipsorum.
Ne nempe horum aliquid, temerè, & præter necessitatem,
resecindatur. Si verò *necessitas*, live citatam opem, live
hanc & non aliam, efflagitaverit, recordabitur dicterii, mo-
do *sanus sensus* observetur, non male fundati: *Melius esse*
membrum aliquod commodo sui usu privari, quam ægrum
vita. Nominatim autem in *Arteriarum* vulneribus, (di-
co, *Incisionibus* non ad plenam *dissectionem*, factis,) si vul-
nus, uti certè immediatam, ita etiam mediatam, supra il-
lud versus cor, *arctiorem* talem *compressionem* non patitur,
ut citissima vulneris sanatione, deinde sperari possit suffici-
ens *mora* obligationis sine religatione, sub qua arteria iterum
consolidescere possit, quod omninò longum tempus requi-
rit: interim verò *Hæmorrhagiæ* graviter urgeant, & *sanies*
vulneris etiam labia *vasis vulnerati* depravet, unde nulla
Consolidatio in hac parte amplius speranda venit: Ibi potius
plenam Dissectionem suadere meminerit, quàm ut consenti-
at, patientem temerè viribus exhauriri, per incompscibi-
les *hæmorrhagias*: vulnus totum, & *inutiliter* insuper, de-
pravari, per nuda *Astringentia*, aut *Acida* coagulantia, aut
quoscunque similes ausus: si *Spiritus vini rectificatissimus*
spem cohibendi destituerit. Nunquam autem *Arteriarum*,
incisione solum affectarum, *Ussioni* consentiat: utpote non
solum *Experientiæ*, sed etiam omni *Rationi* adversantem, &
consolidationem talis arteriæ, in *perpetuum* irritam, inò im-
possibilem reddenti.

LIX.

Sicut autem in genere pro vero generali *Officii* sui sco-
po, reputabit, ut *Temeritati* & *Imperitiæ*, & utriusque con-

tumaci prosecutioni, obices ponantur; ita *errantes*, salutari-
bus interim monitis auscultare paratos, humaniter tolera-
re, & melius instruere, & *commonefacere*, cordi habebit:
nihil usquam affectibus, aut proprii commodi aucupio, tri-
buendo. Quod si fecerit, secundum optimam Scientiam,
quâ ipse pollere debet, & bonam Conscientiam, *Officio* suo
rectissime functus erit. Id quod & optamus, & commen-
damus.

DEUM vero T. O. M. quod etiam nos nostro officio
nobis in hac re evolvenda incumbente, satis commode, ut
speramus, fungi largitus sit, humillimis laudibus gra-
tissima mente celebramus.

S. D. G.

